

DISCOVRS DE L'ORIGINE DES FONTAINES DE POUGVES.

Ensemble les plus notables histoires, & obser-
uations de la guarison des maladies, faicte
par l'vsage de l'eau medecinale desdites Fon-
taines de Pougues en Niuernois. Par M.
Anthoine du Fouilloux Doct. en Medecine.

*Avec vne briefue instruction pour user
de ladiete eau.*

Edition nouvelle. Reuenue, & recorrecte.



A NEVERS,

Par JEAN MILLOT, Imprimeur, & Libraire, de
Monseigneur le Duc de Nevers.

M. D. C. XXVIII,

OCCIDENT.

SEPTENTRION.

F. de S. Marcel.



F. de S. Leger, ORIENT.

Omnes sitientes venite ad aquas.
Isa. chap. 55.

Village de l'ougues, MIDY, NEUERS.

A TRES-HAULT ET PVISSANT
 Prince, Monseigneur Charles de Gonzague
 & de Cleues, Duc de Niuernois, & Re-
 thelois, & Mayenne. &c.



ONSEIGNEVR,


Nature à tellement engraué en
 l'entendement de tous les humains
 l'obeyssance qu'ils doiuent à leurs
 Princes, qu'il n'y à sous le ciel na-
 tion si barbare, qui ne tienne cela
 pour une reigle d'Estat, à laquelle il n'est loisible de
 contreuenir en quelque maniere que ce soit: laquelle
 entre nous doit d'autât plus exactement estre obseruee,
 qu'elle à esté confirmee à plusieurs fois par les diuins
 oracles de nostre Dieu. Ce que me remettant en me-
 moire aussitost s'est representé deuant mes yeux les
 commandemens qui de long-temps me furent faicts
 par defunct de tres-heureuse memoire Monseigneur
 vostre Pere, que Dieu absolue, mettre par escrit les
 plus rares, & signalees cures, & guarisons qui se
 feroient par la potion, & usage des eaues medecinales
 de Pougues, ruisselantes en vostre Duché proche vo-
 stre ville de Neuers. Ce que n'ayant peu executer de
 son viuant, par ce que cela dependoit de l'experience
 qui s'en faict tous les ans: Maintenant que partant

d'annees il s'est faiçt tant de preüues de la force & vertu diuerse de ces eäues : l'ay estimé puis que Dieu ä engräué en vous la vine image de feu mödit Seigneur. & qu'il vous ä rendu quand & quand heritier de ses heroiques vertus, lesquelles plustost diuines qu'humaines rayonnent en vostre ieune aage, parmy plusieurs nations estrangeres, mesmes contre l'ennemy de Iesus Christ, la desponille & marque receue estant ä aguieres en l'armee Imperiale, les esclaircit, rend encores plus notoires ä un chascun. Je n'ay peu que ie ne consacrasse cest ouurage ä vostre tres-illustre grandeur. Ä quoy ie suis encores conuié outre le deuoir de la nature, par ce que s'il fault rapporter toutes choses ä leurs principes, la France doit ä feu mondit Seigneur la descouuerte de ces eäues, qui vingt-ans y ä, assiste du sieur Pidoux tres-doçte medecin, en fit le premier essay: Ce grand thresor ayant esté cele iusques ä son temps aux siecles passés. Par ainsi (Monseigneur) ie croy qu'on ne scauroit dignement recognoistre tant de biens faiçts innumerables, qui ordinairement nous sont par vostre grande liberalité distribués, qui est vne autre fontaine vostre, qui ne tarit iamais: seulement nous donnent vn seul moyen ä nous possible, de presenter tres-hüble priere ä Dieu, de vous maintenir, & conseruer en tres-heureuse & longue vie, & de nous donner le pouuoir de vous demeurer pour iamais.

MONSEIGNEVR,

Vostre tres-humble, & tres-obeyssant
serulkeur A. du E.

BRIEFVE INSTRUCTION
pour l'usage des eaues medecinales
de Pougues.

 Vparauant qu'entrer à la description des obseruations, semble qu'il fera conuenable, & vtile de rapporter sommairement, ce qu'on a remarqué pouuoir estre le plus necessaire de garder, obseruer, & suiure, à ceux à qui on auroit cōseillé boire de ladiète eau, pour remedier à leurs mauuaises affections corporelles, & maladies, desquelles ils pourront estre attaints, à fin qu'ils sçachent, & soient instruits de l'ordre & methode, pour en vser salutairement, pour le tout ioindre avec les exemples cy apres descrits, au plus grand aduancement de la santé d'vn chascun. On se souuiendra doncques d'obseruer quatre poincts principaux, c'est à sçauoir : Le temps & saison pour en vser, La quantité qu'on debura boire chasque matin, L'ordre qu'on doibt tenir, & suiure en beuuant & le quatriesme, & dernier, le regime de viure, qu'on doibt garder durant le temps dudit ysage

La saison doncques la plus propre, & conuenable pour boire sur le lieu de ladicte eau Medecinale est lors qu'elle est chaude, & seiche; Et d'autant qu'ordinairement les mois de Iuin, Iuillet, & Aoust sont, ou doibuent estre, de ceste temperature, on les choisist, ou partie d'iceux, entre les autres. Toutesfois les mois de May, & de Septembre, si la chaleur domine, exemptes de beaucoup de pluyes, peuuent estre propres pour vser de ladicte eau, mesmes en plain Hyuer l'eau desdictes fontaines est, & retient la mesme qualite, & vertu minerale, pourueu que par les inondations des eaux estrangeres, elles ne soient alterees, changees, ou corrompues. Mais le corps humain n'est lors disposé pour les receuoir, si bien qu'en temps d'Esté, à cause que l'estomach se trouue estonné, & esbranlé par l'iniure de l'air, desreiglé en froideur & humidité, (qualitez cōtraires audit remede.) Vray est que lors que la necessité nous contraint, cōbien que la saison soit froide, & humide, en ceste condition on pourra se contenir, & boire dans la chambre, l'air estant bien corrigé par vn bon feu, faisant aussi bien vn peu chauffer ladicte eau, pour empescher les accidens, qui la pourroient autrement accompagner. Car ainsi la plus grande froideur actuelle sera ostee, sans auoir perdu les parties tenues, ou esprits subtils

minéraux.

Pendant doncques lesdits trois, quatre, ou cinq mois à cause de la chaleur, & secheresse, on en peut, & voit on vser avec heureux succez tous les iours, durant vn de ces mois, aux vns quarante iours, à d'autres plus ou moins, selon que la maladie, & indisposition le requiert, & ce sur les six heures du matin au mois de Iuin, & Iuillet, & sur les sept heures au mois d'Aoust, & May : Mais en Septembre, seroit profitable de differer iusques sur les huit heures, à cause que le Soleil ne demeure point si long temps sur nostre Orison, ou Emisphere, par ainsi les iours sont plus courts, les nuits par consequent, plus longues, & les matinees plus froides qu'au parauant. Ceste heure, disie est plus propre d'autant que l'estomach vuide, & desliuré, la concoction, & digestion estant faicte de la viande du souper precedent sobre, & moderé, le susdit remede est de plus grand effect, & energie, pour distribuer sa vertu aux parties desreglees, & intemperees plus librement, la chaleur naturelle se trouuant en plus grande vigueur, & force que lors qu'elle est epechees, & oppressees par la quantité de l'aliment prins au repas.

Je passe soubs silence à descrire le temps, & heure qui peut estre propre, pour prendre de ladicte eau apres le disner. D'autant que ie n'ay

iamais cy deuant, ny ne puis conseiller d'en vfer
 deux fois le iour, pour en boire sur le soir à
 quantité, comme on faict au matin. La raison
 est assez notoire à vn chascun, ne pouuoir estre
 vtile, ny proffitable. Car la chaleur naturelle, &
 faculté concoctrice, estant lors occupee pour
 digerer la viande du disner precedant, on la
 corrompt, & diuertit de son office, l'empeschât,
 & presque suffoquant pour la quantité d'eau
 qu'on remet dans l'estomach, desia remply &
 rendu: le surchargeant encores bien tost apres
 de la viande du souper, proche de la nuict, tēps
 dedié pour le repos, durant lequel ladiète eau
 croupit, & sejourne par trop dans iceluy. Par
 ainsi au lieu d'oster & resoudre les obstructions
 du Foye, Ratte, & Mesentere, cela les pourroit
 augmenter, & les rendre plus reuesches au re-
 mede qu'auparauant, & faire la chaleur inhabile
 à maistriser l'intemperie inegale, ne la pouuant
 conduire à vne symmetrie, & temperature
 naturelle.

Il semble que pour le regard de la quantité,
 qu'elle ne se peult proprement limiter, ny pres-
 crire à chascun, comme il appartient, veu que
 les vns sont ieunes, les autres plus aagez, l'un est
 fort, robuste, bilieux, l'autre debile, de petito
 complexion, ou melancholique. Il y en a à qui
 sont trauaillez d'une espeece de maladie, d'autres
 d'une

d'une autre. Par ainsi seroit mal à propos d'en donner vne mesme quantité indifferemment à tous. Mais est seant, & necessaire de la proportionner à la portee, & force d'un chascun, selon l'occurrence des indications qu'on pourra prendre du subject: Et toutesfois seroit profitable qu'aucun n'en beut plus hault de cent, ou six vingts-onces, ny moins de quarante. D'autant que la trop grãde quantité peult apporter beaucoup de mauuais symptomes, & accidens, comme vomissemẽs douleurs d'estomach, diarrhee, ou dissenterie, & la petite quantité sejourne, & croupit dans l'estomach, & intestins, sans faire aucune actiõ, & par ainsi se corrompt, se corrompãt, ie laisse à penser le profit, qu'elle peult apporter.

La quantité donc mediocre, & moderee, prise par vn bon ordre, & methode, sera de soixante dix, ou quatre vingts-onces. Le premier iour, à l'heure susdicte, on pourra commencer par six verres, de huit onces chascun, qui est quarante onces. Le lendemain huit augmentant de deux, ainsi iusques à quatre vingts õces, la quantité on continuera, sans en boire plus ny moins, iusques au troisieme iour, auparauant que de se retirer, & lors fauldra diminuer d'autant de verres, qu'on auoit augmenté au commencement, faisant quelque peu de distance en buuant de deux en deux verres, ou bien vn à

vn, plus ou moins, selon la cōmodité de celuy qui boit, & se promenant maschera vn bien peu d'anis, ou fenouil sucré, tant pour continuer à boire plus aisement, que pour dissiper les vents, laquelle quantité de quatre vingts onces, il est bon de boire dedans vne demie heure, ou trois quarts d'heure pour le plus à ieun, comme à esté cy deuant escript.

S'il est possible on se contētera de deux repas le iour, disner quatre ou cinq heures apres auoir beu, ou enuiron : & souper sur les six heures du soir, faisant en sorte qu'il y aye entre les deux repas sept ou huit heures d'interualle, & iceux sobres. Ayant soing de choisir des viandes faciles à digerer, & qui peuuent produire vn bon suc, & nourriture profitable, sans incommoder aucunement l'estomach, boullies, si mieux on aime, au disner : & rosties pour le souper. Auquel rang pourront estre mis le veau, mouton, cheureau, agneau, chappō, poulet, pigeoneaux, perdreaux, leuraux, & lapereaux, fuyant la trop grande varieté. Les viers maigres, les œufs mollets, en coque, ou pochez dans l'eau, sont propres. Pour le poisson, la perche, la truite, ou brochet, plustost rosty, que bouilly, le guyon, ou losche fricts au beurre. Pour le boire, on choisira du vin qui soit blanc, ou bien clair et, non fumeux, ou va poreux, trempé mediocrement.

Le vin blanc est profitable, estant aperitif, passe-plustost, ayde à resouldre les obstructions des viscères, & conduit l'eau sans long-temps sejourner. Les espiceries, salures, saulces acres, & de hault goust, sont contraires, comme sont toutes sortes de fruiet crud & salades, melons & concombres. On pourra vser pour le desert de quelque raisin de damas, ou prune de brignolles, parfois d'une poire, ou pomme bien cuite, & suceree, ou du biscuit. Le dormir du iour est fort contraire, & se tenir par trop aux rayons du Soloil. D'autant qu'oultre d'autres raisons, cela pourroit accroistre les vapeurs au cerueau, lesquelles ladicte eau medecinale dudit Pougues y transporte, estant de son naturel vaporeuse, & mesmes en produire d'autres de nouveau. On doit auoir pareillement soing de fuir tout chagrin, ennuy, craincte, & tristesse, & autres passions de l'esprit, lesquelles peuuent beaucoup alterer, & changer la santé.

De vouloir à present traicter plus ampleme[n]t des six choses non naturelles, sçauoir de l'air, du boire, & manger, du dormir, & veiller de l'exercice & repos, de l'euacuatiõ, & suppression des superfluitez du corps, des passions de l'ame, lesquelles choses peuuent nuire, ou profiter à la santé du corps humain, semble qu'il seroit inutile, & sans beaucoup de sujet, veu qu'un

chascun les pourra remarquer, & facilement
apprendre, par le traité que Monsieur Pidoux,
Docteur & Doyen en la faculté de medecine en
l'Vniuersité de Poictiers, à escrit, & d'autres :
les ayant clairement specifics, avec telle do-
ctrine qu'il à este en ce faict requis, & necessaire.

A MESSIEURS LES MEDECINS

SVR LES EFFECTS E'MERVIL-
lables des eaux de Pougues,

SONNET.

VOUS esprits repurgez de l'humaine ignorance
Par les celestes dons d' Apollon chasse maux,
Venez à Pougues veoir sortir de trois canaux
Vn'aigrette douce eau d'admirable puissance :
Venez pour y monstrez vostre belle science.
Et les concepts diuins de voz doctes cerueaux,
Contemplant les effects de ces curables eaux,
Qui donnent aux humains de leur mal allegence.
Venez y pour y veoir l'Hydropique alteré,
L'hectique, le pierreux, le debile ulceré,
Recepuoir sans grands frais guerisons souveraines.
Mais, non, ne venez pas, car voicy du Fouilloux
Tres-docte Medecin, qui en mots graue-doux
Vous enuoy le pourtrait de ces cheres fontaines.

Bourbonnat M. Apoticaire à Neucrs.

DE LA SOURCE ET ORIGINE DES FONTAINES.

CHAPITRE I.



Ombien que l'on ait traité
suffisamment par ce qui à esté
autresfois imprimé de ce qui
appartient à l'vsage des eaux
medecinales des fontaines de
Pougues, de leur situation, &
contre quelles maladies elles peuuent seruir si
ne sera il pas toutesfois mal seât en cet endroiât,
d'y adiouster quelque chose de l'origine des
fontaines, de l'vtilité de l'eau, & de ses diuers
effects selon les endroiâts d'où elle sort, à fin que
l'occupatiõ d'un quart d'heure que les malades
employeront à la lecture de ce discours, leur ap-
porte autant de profit, que de contentement.
Or pour entrer en matiere, les Philosophes sont
d'accord, que l'origine des fontaines, & des ri-
uieres, vient de mesme part, mais ils ont des
opinions fort differentes sur le faict de cette
origine, & cause des fontaines. Les vns tiennēt
que toutes les fontaines & riuieres, ont leur
source de la mer : les autres disent qu'elles sortēt
des concaitez de la terre, & sont engendrées

de la pluye. Aucuns aussi mettent en auant, qu'il y a quelques fontaines & riuieres, la source desquelles prouient de la mer : d'autres desdites concauitez de la terre. Platon en son Phædron assure que toutes les fontaines prennent leur source, & commencement du centre de la terre, auquel endroi& il situoit l'abîme par luy appelé, *Tartarus*, qui est comme vne fontaine tres-grande, de laquelle toutes les autres eaux qui coulent par tout l'vniuers, sortoient. Ceste opinion est tenue pour fausse, d'autant que si cela estoit vray, il seroit de besoin, qu'un corps graue & pesant, (tel qu'est l'eau) montast és lieux hauts, & eminents, cōme sont les montaignes, là où coustumierement on voit de belles & bōnes fontaines, chose qui seroit du tout contraire à son naturel. Oultre plus ce lieu là nommé *Tartarus*, est prins pour le lieu des enfers par beaucoup de Theologiens tres doctes. La seconde opinion a esté de quelques Philosophes, qui tiennent que toutes les fontaines prennent leur source des pluyes, & que dans la terre ne se peut engendrer aucune eau, comme raconte Aristote en son premier liure des Meteores, laquelle luy mesme a refutée. Il est impossible que toutes les fontaines & fleuves puissent sortir des pluyes non pas seulement à cause que l'eau de la pluye ne scauroit descendre, plus bas dans

la terre que dix pieds, selon Senèque : mais aussi d'autant qu'elle se consomme aussi par la secheresse de la terre : ou bien par ce que la terre estant abreuuée, chasse le reste de hors, & ainsi le plus souuent se font estangs. D'auantage veu qu'il y à vne grande inconstance pour le faict des pluyes, maintenant en y ayant à grande quantité, tantost n'en y ayant point, il faudroit par consequent, que les fontaines se changeassent souuent, tant en leur quantité que en leur flux, si ainsi estoit qu'elles fussent produites de la pluye : Et d'autrepart il se trouueroit en lieu bas plus de fontaines qu'aux montaignes : ce neantmoins, nous voyons tout le contraire. L'on atribue la troisieme opinion, à quelques anciens qui assuroient la mer Oceane, pour estre si spacieuse & ample, estre la source, & le commencement de toutes les autres eaux : Du nombre desquels à esté Albert li 2. traicté 2. chap. II. Les Docteurs de Louvain, sur les Meteores, au doubte 8. Le premier à esté Senèque au 3. liures de ses questions naturelles cha. 15. & 19. Cardan traicté 4 cha. 1. Scaliger, Exercice 46. & plusieurs autres modernes lesquels prennent leur principale raison, & fondement de la sainte Escriture. Car l'on trouue au 1. cha. de l'Ecclesiastique ces mots. *Omnia flumina intrant in mare, & mare non redundat : ad locum unde exe-*

unt flumina, Et iterum fluant. Pour la quatriesme opinion, nous receurons celle d'Aristote. Lequel au liu. 1. de ses Meteores, & au 2. cha. 1. dit que les fontaines & riuieres se font, & prennent leur commencement de l'air, & vapeurs qui sont enclos dans les vaines, & sinuositez de la terre, de sorte qu'elles sont premierement conuerties en petite goutte, en s'espaississant par froideur & condensation: lesquelles gouttes attachées tout autour des costez desdits creux, distillēt, & descendent en bas au fōds des cauens, & ainsi s'assemblent, & amassent successiuement beaucoup de gouttes ensembles. & font quantité d'eau, qui sort par l'orifice de ladite concauité & coule à la partie de la terre, qui se trouue la plus inferieure & basse. Laquelle opinion a esté suiue par Alexandre, Olympiodore, Auerrois, S. Thomas, Titelman, cha. 7. & sur le 1. cha. de l'Ecclesiastique, & beaucoup d'autres Philosophes, qui sont sortis de l'Academie Parisienne. Aristote confirme son opinion: Le plus souuent dit il, l'on voit, que les fontaines, & fleues prennent leur source en des hautes montaignes, & bien rarement en bas pays, qui ne peut proceder d'autre cause sinon pource que les lieux hauts & eminents, ont coustamment beaucoup de concauites interieures, qui sont remplies d'air, & vapeur. Or ces cauens
dans

dans terre & creux, se font par la chaleur du
 Soleil, par laquelle certaines exalations de la
 terre accompagnées d'une vapeur humide
 s'eleuent, lesquelles font que la terre se dimi-
 nue en la partie qu'elle est humectée interieu-
 rement : & ainsi rompt & separe les parties les
 plus seiches & dures : De sorte que ceste exala-
 tion de la terre s'estant rendue plus ample se se-
 parant, cherche la sortie libre, & lors qu'elle luy
 est empeschée enleue aucunesfois la surface de
 la terre, & produit exterieurement des mon-
 taignes laissant des grottes & des cauius au
 dedans. Par mesme moyen, le tremblement de
 terre esmeu par ces exalations encloses dans
 icelle font cause de faire separer & diuiser la-
 dicte terre en quelques endroits, d'où sont
 produicts quelques gouffres & abismes par
 fois apparens, d'autresfois cachez & occultes.
 Aristote pour asseurer son opinion apporte
 quelques exemples des montaignes d'Asie, cō-
 me du mont Parnasse, Caucaze, & autres, des-
 quels l'on voit sortir des fontaines & fleuves en
 grand nombre. Ce que nous voyons aux mon-
 taignes qui sont en l'Europe, comme es monts
 Pyreneés, d'Afrique, D'auuergne, & autres.
 D'auantaige cette opiniõ se peut prouuer ain-
 si: Puis que les fleuves sortent des fontaines, &
 que le plus souuent les fontaines se font es

montaignes, c'est signe donc qu'elles prennent leur source d'icelles : Car si elles auoient leur commencement de la mer, l'on verroit plus grand nombre de fontaines és vallées, & plat pays qu'aux montaignes : ce qui est contre l'expérience ordinaire. L'on ne peut apporter raison suffisante pour monstrier que l'eau de la mer (qui est en lieu bas) puisse monter en si hautes montaignes, ou nous voyons tant d'orifices, & source de belles fontaines, veu que l'eau à cela de naturel comme tout autre corps graue & pesant, de se retirer tousiours au lieu le plus bas. Iule de l'Escalé respond que l'eau de la mer peut monter aux montaignes, d'autant qu'une partie de l'eau qui est dans la mer est enleuée par dessus son lieu naturel : & icelle lors qu'elle s'efforce de paruenir à son lieu propre, avec force, & violence pousse l'eau plus basse, laquelle estant ainsi poussée entre dans les conduits & cauernes de la terre, & par autre eau qui suruiét, & y à borde successiement (estans les conduits estroicts) est contraincte par violéce de monter & tasche de sortir en hault, donnant place à celle qui vient de nouveau, de laquelle elle est poussée luy laissant le lieu libre & icelle à d'autre. Cette responce n'est suffisante, d'autant que les mariniers & ceux qui prennent plaisir à nager apperceuroient que l'eau de la mer en

son lieu naturel seroit pesante, & poussant en bas contre toute experience. D'auantage il est difficile à croire que l'eau selon certaines parties soit en lieu plus hault que son lieu naturel ne requiert, par ce que l'on voit la mer selon toute sa surface estre contenue souz la superficie de la terre. De tous costez que le marinier vogue l'on rencontre des Isles, & autres terres les bords desquelles contiennent souz soy la superficie de la mer. Ce que pareillement le cours coustumier des riuieres peut monstrier, car l'eau tousiours esclance sa course en bas, & toutes les riuieres se vont degorger dedans la mer, comme le lieu le plus auallé. D'auantage cette force & violence ne s'accorde avec l'experience, qui nous faict toucher au doigt, que l'eau de la mer si elle n'est agitée par les vents ou par son propre flux ou reflux demeure calme & reposée. Il y en à qui donnent ceste responce: L'eau de la mer est plus pesante que celle des fontaines, par ce qu'elle est plus grossiere, impure, & meslee: Car entrant & passant par les concauitez de la terre, elle se purge & nettoye des exhalations terrestres qui rendent la mer salee & se rend douce & plus legere, passant par les conduits de la terre, la dernière comme la plus pesante pousse l'autre qui est deuant, & ainsi par consequent iusques au sommet des montaignes où sont

coustumierement les plus grandes concauitez de la terre. Et lors qu'il ne se presente autre chemin pour aduancer plus loing sa course encommencee, la terre s'ouure & se fait vne fontaine puis apres reprend sa carriere & s'en va fonder es lieux plus abbaïſſez. C'est la raison qu'ils rendent pourquoy l'eau des fontaines & riuieres n'est point ſalee, comme eſt la mer d'où elles ſortent : car l'eau de la mer eſt ſalee, non pas de ſon naturel, mais par accident, à cauſe des exhalations terreſtes & brulées, qui ſont tirees par l'action des rayons du Soleil, lequel attire à ſoy les parties plus humides & ſubtiles de la terre : & pour cette cauſe les exhalations qu'il eſleue ſe meſlent parmy l'eau de la mer & la rendent amere.

Auparauant que paſſer plus auant, ne ſera pas mal à propos de donner à entendre, comment quelques fontaines ſe perdent & tariſſent par fois. Cela prouient de quelque maſſe ou ſubſtance terreſtre aſſemblee à cauſe du coulement de l'eau qui ſe met au deuant de l'orifice deſdites fontaines, & les eſtousse entierement à cauſe dequoy le chemin accouſtumé de ladicte eau eſtant ainſi empesché ſe dreſſe vn conduit en vne autre part. Et pour lors l'on dit vne autre fontaine eſtre produitte de nouveau. Par fois auſſi par vn tremblement de terre il ſur-

nient que la terre s'ouure de telle sorte que quelques concaitez d'ou sortoient des fontaines se comblent & remplissent, & lors ne se peut plus assembler ny sortir d'eau, & la fontaine qui auoit accoustumé de sourcer en cet endroit se perd & tarit & prend son chemin ailleurs. Je veux bien aduertir en passant, qu'il y à vn ciel crystallin, ou d'eau, selon l'opinion de presque tous les Astrologues, mais il ne nous produit point icy bas des fontaines, ny eau aucune, d'autant que ce ciel est par dessus le firmament, & cette eau est si subtile & legere qu'elle est cōuertie en nature du ciel. Et le venerable Bede dit que ces eaux ne sont proprement eaux vaporables, mais endurcies & affermies comme le chrystal, qui est pour retarder la hastiueté du mouuement du firmamēt *Hic aquæ dicuntur equinoce quia istæ, quæ sunt super firmamentum sunt de natura celesti: illæ autem quæ sub firmamento, de natura elementari in glosa ordinaria in cap. 1. geneseos Liramus.* Et telles eaux ne sont moites, ny froides, ny coulantes, ny pesantes, ny engendrees, mais elles ont les plus nobles proprietéz de leur nature, c'est à sçauoir la condition de clarté subtilité & transpatence. Les eaux d'icy bas sont froides & moites pour mieux seruir à la generation, & corruption des choses: mais la sus cela n'est point necessaire. Ce ciel est appelé

d'eau pour sa subtilité & mouuement leger, de chrystal pour sa clarté, ce dit Alexandre. Dont nous pouuons seurement conclurre, que entre toutes les autres opinions celle qu'Aristote apporte pour l'origine & source des fontaines, est la plus probable & la mieux receue: Combien que l'on peut dire qu'il n'a pas assigné seulement le commencement des fontaines de proceder d'une seule cause, c'est à sçauoir de la mutation, & changement de la vapeur en eau faicte par la force du froid dans les concauitez de la terre és montaignes, mais aussi de l'aggregation des pluyes faicte aux cauins de la terre. La premiere est la principale. L'autre n'est sinõ qu'une ayde & secours pour faire croistre lesdites eaux. Que si quelques fois il nous semble que l'eau monte en hault, eu esgard au lieu d'où la fontaine préd son commencement, quand cela suruient il ne faut point l'attribuer à la cõdition de sa nature, ny a l'ordre vniuersel, mais à une force & violēce d'une eau pousant l'autre, comme l'on veoit par certains engins & instruments. Où toutes-fois il fault remarquer que l'eau ne mōte iamais plus hault qu'est la source d'où elle est tiree, tellement qu'elle rebrousse son cours quand elle est venue a l'egal de ceste haulteur: & quand elle ny est venue, elle deualle bien qu'elle sēble monter.

Quand est des paroles du Sage qui dit, que les riuieres sortent de la mer, elles ne se doiuent point entendre vniuersellement, mais indeterminément de quelques riuieres seulement, non point de toutes : Ou bien l'escriture entend par ce mot de fleuue, ou riuiere, les seuls torrents, comme S. Hierosme sur l'Eclesiastique chap. i. a interpreté, & comme le mot Hebreu porte *Anealin*, & le Grec, *Cheimarrous*, c'est a dire hyeme fluens. *Quod per influentiam solis & stellarum eleuantur vapores humidi, à mari condensantur in nubes, quæ per ventos deferuntur longe super aridam, & tandem resoluuntur in pluuias, ex quibus augmentatur flumina ad mare currētia.* Liranus in glossa ordinaria in cap. i. Ecclesiastes, d'autant que les torrents viennent principalement en hyuer, & par ainsi pouuons nous dire que les torrents, ou telles riuieres sortent de la mer, pource que les vapeurs & nuées qui souuent sont esleuees a la moyenne region de l'air se conuertissent en pluyes desquelles nous voyons sortir les torrēts coustumierement. D'auantage ledict S. Hierosme au mesme chapitre dit les Hebreux auoir mieux iugé, entendants par le nom des torrents & de la mer, par Metaphore les hommes pource qu'ils retournent coustumierement en terre d'où ils sont sortis: Et sont appelez torrents, & non pas fleuues: Combien que leur vie soit

briue & transitoire, ce neantmoins on ne veoit point pour les trespas frequents d'iceux la terre en estre remplie.

*Des diuers effects de l'eau selon la diuersité
des lieux par où elle passe.*

CHAPITRE II.

IL ne fault penser que la terre en laquelle nous habitons qui produit les herbes fruiets & autres choses necessaires pour la commodité & nourriture de l'homme : ny l'air par lequel nous iouyssons de la respiration libre : ny le feu l'usage duquel est necessaire pour l'aduanchemēt de la vie hamaine : ny finalement l'eau laquelle nous est donnee de nostre fouuerain Seigneur & Createur pour vn des trois aliments necessaires pour nourrir & entretenir l'homme en vie, soient les quatre purs & simples elements. D'autant que les elements purs de leur nature & en leur estre simple, ne peuuent porter au fēs aucun effect ny passion : *Aque purissima sunt qualitatibus expertes, Gal. de comp. Med. Sec. loca, lib. 4.* Et nous qui sommes corps, composez & mixtionnez ne scaurions estre nourriz d'iceux ainsi simples. La definition qu'Aristote en apporte en son liure 1. de Cœlo, chap. 3. en donne assez euident tesmoignage, *Elementū, inquit, est corpus simplex,*

simplex, in quod cetera corpora resoluuntur, & in quibus inest potentia vel actu, estque indivisibile secundum species. Pour plus grande preuve, prenons l'eau de laquelle auons entrepris ce propos, laquelle indubitablement si elle estoit en sa disposition naturelle pur element froid & humide, n'auroit aucune faueur de soy, ne seroit trouuee aucunement chaude, n'auroit aucune douceur ny amertume. Il fault doncques qu'elle s'acquiere ses faueurs & vertus d'ailleurs, outre son naturel: tout ainsi que nous experimenterons iournellement, que les vents qui procèdent d'une exhalation chaude, & seiche, aucunesfois ils raffrechissent, par fois ils humectent, autresfois ils eschauffent, comme confirme Hippocrates au second liure de Dieta, disant: Combien que les vents ayent pouuoir de refroidir & humecter, ce neantmoins à cause de la situation des lieux & regions par où ils passent, ils se rendent plus froids, chauds, humides, ou secs, ou plus nuisibles, ou bien plus salubres. Ainsi ie veux dire, que sont les eaux des fontaines, s'imprimant la vertu ou qualité de la terre, nitre, soulfhre, alun, vitriol, ou autre sorte de mineral qui se rencontre dans les veines de la terre, là où elles ont accoustumé de passer. *Iauellus lib. 4. c. 4. D. Anselmus 1. De imagine mundi cap. 22. Albertus lib. 2. cap. 2. Co*

que nous pouuons encores aisement cognoistre si nous regardons l'artifice qu'on pratique iour-
 nellement en la medecine pour la cure de plu-
 sieurs & diuerfes maladies, d'autant que pour
 faire des remedes cholagogues nous faisons ver-
 ser dans de l'eau de cichoree de la Rhubarbe,
 laquelle eau s'attribue la vertu du simple, qui a
 sejourné dedans pour purger la bile. Pour pre-
 parer des remedes melanagogues, nous auons
 accoustumé bien souuent de tremper du senné
 dans de l'eau, laquelle prend la qualité dudit
 senné, qui est d'euacuer, & purger l'humeur
 melancholic : & ainsi vne infinité d'autres re-
 medes. Si doncques l'eau artificiellemēt s'acqui-
 erit la vertu du simple, ou matiere, par laquelle il
 aura passé, ou sejourné, combien est il plus rai-
 sonnable que cela se face naturellement, veu
 que ce qu'on faict ordinairement par la faculté
 de medecine, n'est autre chose qu'une emulatio
 & suite de ce que nature luy monstre, taschant
 par tous moiens de la suiure & imiter en ce qui
 luy est possible ; Car nature (comme dit Galie,) *Est omnium opifex lib. de Arte medicinali, cha. 77.*
Medicus vero minister. Par ainsi vous voyez les
 eaux des fôtaines de Pougues estre de telle ver-
 tu & efficace, que pouuons coniecturer, sortir
 de la mine du vitriol, (qui est vne substance
 minerale produicte par vne exalation : laquelle

n'est pas beaucoup esloignée coustumierement
de quelque mine de souphre petite ou grande)
Voyla pourquoy les pierres dessus lesquelles
ladite eau coule, sont tachees & marquettees
de taches iaunes, & vertes Sa saueur est aspre au
gouster, & rend quelque aigreur à la lāgue, avec
vne astringtion. La fontaine S. Marcel plus que
l'autre, pour ce qu'elle participe plus du vitriol
que celle de S. Ligier. Telles mines se trouuent
le plus souuent en des lieux separez, & sauuages,
& vallees, & pieds des montaignes, en terre
noire, & lieux peu frequentez, liure 2. de la Py-
rotechnie du Seigneur Vanoccio Biruquario
Siēnois. Les Grecs appellent le vitriol *Calcātum*,
pource qu'il approche de la semblāce d'airain :
Le Latin en ce qu'il ressemble au verre *vitriolum*
ou bien *atramentum futorium*, d'autant que les
Corroyeurs en vsent pour noircir leurs peaux &
cuirs. Je confesseray certainemēt, qu'il y a quel-
que apparence de verité en l'opinion de quel-
ques vns, qui ont voulu dire que les eaux de
Pougues ne sont pas seulement vitrioleuses, &
sulphurees, mais aussi ferrugineuses : car ces
lieux circōuoisins son pleins de mines, & forges
de fer, comme est quatre lieues autour : & aussi,
que le limon de l'eau qui se trouue au goulet,
& paroy desdites fontaines, est aussi iaune &
rouge tirāt sur la rouilleure de fer. Tellemēt qu'il

semble que demeurant & croupissant là quelque temps il acquiert la couleur de fer, qu'on laisse à l'air sans l'exercer & mettre en ceuvre. D'avantage le goust approche fort de la saueur de l'eau des mareschaux, où ils esteignent leur fer, il est vray qu'elle est plus aigrette, participât plus de la subtilité tenue, & vaporeuse substance qui luy donne vn goust piquant, acré, aucunement aigre, en quoy l'on coniecture qu'elle tiét plus de la substance de vitriol, que d'autre metal, combien qu'elle aye quelque qualité, & versu de la mine de souphre & fer, mais le vitriol est dominant. Et pour dire, & confesser ingenuement la verité, les eaux metalliques ne peuuent estre bien cõgneues, si elles ne sont rapportees aux maladies qu'elles guarissent ordinairement, car le remede n'est qu'en ce qu'il est contraire, & s'oppose au mal. Or est il qu'un contraire ne peut estre entendu & cognu qu'avec son cõtraire. Quant est des eaux metalliques elles ont diuers effects, dont la cause vient de leurs compositions & mēlange, laquelle nous recognoissons obscure & cachee aux hommes, Dieu & nature s'en estants reserué la cognoissance si ce n'est que par quelque probabilité & coniecture : d'autant que nous ne pouuons au vray cognoistre en quelle façon & proportion nature les à mēlāgees, pour en faire medecine tāt excellēte :

Tellemeēt que pour la plus part l'on vse des eaus, pluſtoſt par vne experience que nous auons que par raiſō & diſcours que nous en puiſſiōs apporter. Toutesſois en quelques vnes nous pouuōs remarquer quelque inſigne qualitē, couleur gouſt & ſauueur, qui nous faiēt aucunement paroître leur temperature, force, & propriētē, cōme en cette icy quand elle n'auroit en ſoy autre vertu que la qualitē qu'elle tire de la mine du vitriol, cela ſeroit ſuffiſant pour rapporter beaucoup de profit, pour ſurmōter la violence que beaucoup de maladies font à la nature humaine. Pour cōfirmation de ce, regardez ce qu'en dit Galien au 4. liure de la compoſition des medicaments ſelon ſes genres. Entre tous les metaux (dit il) le vitriol a la plus grande vertu de deſeicher & eſt accōpnē d'une chaleur avec ſon aſtriſtiō, dont il peut beaucoup conſeruer la chair de toute corruption, en deſſeichāt l'humiditē trop grande, en reſerrant la chair trop molle, & humide *Gal. de ſimpl. medic. facult. li. 6.* Voyla pourquoy il guerit les vlceres putrides, corrobore renforce. & conſerue l'eſtomach. Car comme dit Galien, toutes choſes reſtringentes ſont plaiſantes à l'eſtomach. Et le ſouphre, duquel auſſi leſdictes eaus ſont participātes, & cōpoſees eſt d'un tēperamēt chaud, & d'une eſſēce ſubtile. Il guerit la toux inueterēe, qui cauſe le crachemēt

du sang : il oste la difficulté de respirer, il dissipe les ventositéz : il tempere les douleurs des reins causees par les vents : il est propre pour la iau-
 nisse : il atténue & diminue la rate enflée des vents : il desseiche l'humidité qui suruient à l'y-
 dropisie prouenant du froid : il a la vertu d'es-
 chauffer, desseicher, resouldre, ouurir, atténuer, ou subtiliser, & incorporer. D'où pouuons cō-
 gnoistre combien de profit ladite eau peut ap-
 porter à toutes les maladies froides qui suruiē-
 nent au corps humain. Pour le regard du fer, voyez ce qu'en raporte Auicenne parlant de la nature de l'eau, ayant la qualité, & vertu du fer : Elle peut, dit il, conforter les parties nobles, & oster les pourritures de l'estomach, & luy sōt fort conuenables & à la rate fort propres. Le vitriol à toutes ces proprietez & vertus ensemble : il desseiche, subtilise, nettoye, resserre, & res-
 treint. Et combien que lesdites eaux ne fussēt composees d'autre mineral que du vitriol, ce seroit assez (me semble) car le vitriol de son es-
 sence il retient, & a avec soy la propriété du souphre & du fer, comme confirme ledit seigneur Vanoccio au mesme liure. Et par ainsi lesdites eaux receuans la vertu du vitriol, ioinct avec les autres, apporte tant de belles commo-
 ditez, & faict guarir si grandes & frequentes maladies d'estomach, de la rate, du foye, des

reins, du mesentere, & néttoye ce qui se trouue d'estrange à la capacité des reins vreteres & vesie, & faict mourir les vers qui s'engendrent dans les intestins ou ailleurs, resistant à la putrefaction par sa vertu desseichante, acidité, & astriction. Outre la raison & experience que nous en auons, voyez ce qu'en dit Oribasius, liure 15 chap. 1. & qu'elle vertu il attribue audit vitriol, duquel lesdites eaux recoiuent efficace & qualiré. C'est chose admirable, (dit il) qu'en ce medicamēt qui à vne tres grāde force de resserer & restreindre, il y a vne chaleur meslee avec son astriction. Il est donc certain, qu'il peut cōseruer la chair humide, & la preseruer de toute corruptiō. Car par sa qualité desseichante, il deuore, & cōsomme toute sorte d'humidité : & par son astriction il resserre la substance trop lasche & molle. Mais pour ce que nous apperceuons presque toutes choses astringentes estre froides, le vitriol toutefois (qui est des plus astringēts) est chaud. Cela pourroit dōner occasiō à quelqu'un de contrariété si l'on ne respōdoit qu'il a sa chaleur à cause de l'acrimonie qu'on sent en le goustant, & par ainsi l'on voit son essence estre dissemblable, subtile, estant acre, crasse estant astringente. Par là nous pouuons conclurre la varieté des qualitez des mines, terres, & lieux, par où les eaux des fontaines cou-

lent & passēt, qui les rendent de diuerses vertus & facultez. Et pour plus facilement auoir la cognoissance de nostre dire, il est bon de sçauoir qu'il y a des eaux, les vnes simples qui sont sans aucune saueur, froides, & humides, elementaires, ou qui tiennent fort de l'element : Les autres cōposees, qui se ressentent du goust, & saueur de la matiere, dont elles ont prins leur composition, comme celles qu'on appelle proprement metalliques : desquelles les vnes sont en partie faictes de la nature du nitre : les autres d'alun, de fer, ou de quelque autre metal semblable, qui se rencontre en vne mesme mine, comme nos eaux des fontaines de Pougues, qu'on coniecture & experimēte auoir leur vertu du vitriol : & celles qui ont accoustumé passer par mesmes mines, & d'autres lieux, ont mesme goust, facultez, effects, & vertus, comme celles de Spa, de Crisba pres de Strasbourg en Allemagne, de Vic & de saint martin pres les villes d'Aurillac, & Mauriac au hault pays d'Auuergne qui (comme a esté escrit par d'autres amplement) sont semblables à celle cy, estant par mesme moyen vitrioleuses. Il en y a à Bourbon Lancy, à Bourbon l'Archanbault pres Molins : en Gascongne en Languedoc, en Auuergne, en Forests, en Italie, & en d'autres lieux, qui ne sont pas toutes de mesme facultez, pource
quelques

que les eaux metalliques ne peuvent estre d'une
mésme vertu, les metaux estans en si grande
varieté, & la terre par où elles passent diuerse.
Ce qui se pourra monstrier, pour le contente-
ment du Lecteur plus facilement, par quelques
histoires puyfées des escrits des anciens.

En la Iudee il y a vn lac, qu'on appelle As-
phaltites, ou la mer morte, auquel si lon iette vn
homme lié pieds & mains, il nagera au dessus
sans enfoncer, pour la matiere espaisse & gros-
siere qui est meslée dedans cette eau, ce dit
Aristote liu. 2. cha. 3. En vne region de la Grece,
se trouue vne fontaine d'eau salée, laquelle estât
cuite, est changee en sel, ce dit Plin. liu. 2. cha.
103. Ce qu'on trouuera moins estrange pour
l'experience qu'on a iournellement de plusieurs
semblables fontaines en la ville de Salins au
Côté de Bourgongne, & plusieurs autres lieux,
de l'eau desquelles on fait grande quantité de
sel. Aupres de la ville de Clermont en Auvergne
y a vne fontaine, l'eau de laquelle en coulant
se change en pierre, & on voit à present vn pont
de pierre sur la riuiera Tiretaine, faict de l'eau
endurcie, laquelle se petrifie en coulant de la-
dicte fontaine dans ladicte riuiera, distant en-
viron trois cens pas d'iceluy. En Sicile se voit
vne fontaine de laquelle on se sert au lieu de vi-
naigre, laquelle Aristote au lieu allegué appelle

Oxalmin. En Lybie pres du temple d'Ammon
il y a des fontaines du Soleil, l'eau desquelles de-
puis le midy iusques a minuiet est tres chaude,
& apres froide, à ce que dict Plin liure 5. ch. 6.
Cōbien que Mela liu. 1. en parle vn peu d'autre
façon. Et Ouide liu. 15. de la Metamorphose dict.

---- *Medio tua corniger Ammon*

Vnda die gelida est, ortuque obituque calescit.

Lucrece en parle liure 6.

Est apud Ammonis fanum fons luce diurna

Frigidus, & calidus nocturno tempore fertur.

La fontaine d'Ammon de iour froide & gelee :

De nuict boult de chaleur toute ardante & bruslee.

Pontano Poëte Italien en rend la cause en ses
Meteores.

Causa quidem vel certa subest, nam frigora noctis

Intus alunt ignes, nocte & vapor aestuat intus,

Vnde fluunt calidi noctis per tempora riu,

Luce autem terras cum sol populatur, & ardens :

Exhalat vis, tum venæ recreantur hiantes :

Vnde redit gelidus sua per vestigia torrens.

La raison est : car le froid de la nuict

Estreinct le feu pressé dans son conduict

Et la chaleur serree en la fontaine

Pousse vn bouillon plein d'une ardante haleine :

Mais quand le chaud du Soleil cuit le iour,

Le feu de l'eau quitte alors son seiour

*Et la froideur dans le courant rameine
Changeant en froid la chaleur de la veine.*

L'on raconte que dans le pays de Sicille y a vne fontaine, laquelle est de telle efficace, que si quelqu'un iuroit en icelle, le serment estant couché par escrit, s'il estoit faux il enfonçoit, dās l'eau, & le pariure estoit à l'instant conuerti en feu, redigé en cendre en quelque part qu'il fust trouué, & quand le serment estoit pour la verité, il nageoit & ne se pouuoit aucunement enfoncer & luy conserué. *Aristote liu. de mirabilibus auscultationibus, & Alexander ab Alexandro lib. 5. dierum genialium, cap. 10.* Au pays de Sardinia dit Solinus, *cap. 10. ubi agit de Sardinia insula*, y a des fontaines l'eau desquelles est de telle vertu, qu'elle querit de toute sorte de maladie de quelque espeece qu'elle puisse estre, si vne fois on s'en est laué tout le corps. Mais s'il aduient qu'un larron touche ses yeux de ladite eau, & qu'il iure à faux n'auoir iamais desrobé, il perd à l'instant la veuë. Que si vn homme de bien iurant pour la verité n'auoir point desrobé, l'aue les siens de ladite eau ils viennent plus clairs & beaux sans aucune macule. Rhennius in Dionysij Peregrin le tesmoigne ainsi disant.

*Sardina postquam pelago circumflua tellus
Fontibus è liquidis præbet miracula munda
Qui sanant egros, pandunt, dampnantque vscanda*

Periuros furto, quos tacto lumine cecant.

Sainct Anselme chap. 20. liu. 1. de l'image du monde, dit qu'il y a des fontaines chaudes, qui donnent guerison à tous malades, & aux larçons font perdre la veüe. D'auantage il y a vne fontaine qu'on nomme Eleacides, auprès de laquelle si on ioue de quelque instrument de musique, elle s'enfle iusques à desborder: & quand l'ocesse de iouer dudit instrument ladicte eau se range à son premier estat. L'on rapporte d'une autre certaine fontaine auprès de l'Isle nommée Naxos, de laquelle vn certain iour de l'an sort & coule du vin tres-doux, & plaisant. Cela, & de quelques autres cy deuant ne se fait naturellement: mais seulement prouient de la puissance du seul Dieu auteur de toutes choses: ou des anges bons ou mauuais ayans receu le pouuoir de luy. De mesme peult on dire de ce qui est rapporté par Paulus Venetus au premier liure de sa nauigation chap. 14. Qu'en vne certaine prouince de Tartarie il y a vn lieu remply de montagnes & fleuves, lequel s'appelle, fontaine Marchelusela (& selon aucuns est la mer Caspie, ayant de circuit six mille pas ou enuiron) lequel apporte du poisson seulement au temps de Carisme iusques au Samedy sainct veille de Pasques, & en autre saison il n'y en a point, lequel lieu est distant de la mer Oceane de douze iour-

nees. D'un autre rapporte Mosa liure 3. ch. 83. en ces mots : Gorgone est vn fleuve dans lequel on trouue du poisson au temps de Carissime seulement. Mela au liure 3. raconte qu'és Isles fortunées du costé de l'Afrique pres de la mer Atlantique, y a deux fontaines dont l'une fait mourir en riant, l'autre sert de medecine si on en boit. En Armenie Maieur y a vn lac qui s'appelle Arethisse plein de Nitre ou sel Armoniac qui de la prend son nom, où rien ne peult enfondrer. Pline liu. 2. chap. 97. En Italie en la maison de plaissance de Ciceron sur le chemin de Puteole y a des bains chauds bõs pour les yeux, sur lequel vn des Affranchiz de Ciceron fist cet Epigráme.

*Hic etiam apparent lymphæ nom antè repertæ,
Lanquida quæ infuso lumina rore leuant.*

*Nimirum lacus ipse sui Ciceronis honori
Hoc dedit, hac fontes cum patefecit ope.
Vt quoniam totum legitur sine fine per orbem,
Sint plures oculis quæ medeantur aquæ.*

*Vn eau sort en ce lieu par le passé non venue,
Propre à reconforter & esclarcit la veue,
Certes en la faueur de Ciceron son maistre
La terre à faict saillir & ces eaux apparoiestre,
Car d'autant qu'il y a force gens studieux
A lire Ciceron qui se gassent les yeux,
La terre leur produit de son plantureux sein*

En ce lieu pour les yeux vn remede certain.

Au premier liure des Epigrammes Grecs, on voit vn gentil traiet d'une fontaine.

Si quelqu'un à peur de se pendre,

Ayant volonté de mourir:

Qu'il vienne des eaux froides prendre,

Qu'on void à Ieraple courir.

Pardelà Surrentū il y a quatre fontaines principales, dās lesquelles si l'ō iette du bois ou des oyseaux, sela se cōuertit bien tost apres en pierres. Selō le dire de Senecque liu. 3. nat. quast. ca. 10. Plin. liu. 2. cap. 103. De cela on peut rēdre quelque raison disant que cete eau est mixtionnee & n'est point elemētaire, & à telles qualitez de produire des pierres: & aussi que le lieu ou situation de telle eau y peut beaucoup ayder pour ce faire.

Le mesme Paulus Venerus liure de sa nauigation chap. 13 dict qu'il y a vne fontaine en la montaigne Gordia en Armenie Majeur, où l'Arche de Noé demeura, de laquelle coule ordinairement vne liqueur en façon d'huile, dans laquelle la meche des lampes estant trēpee brulle en façon de chandelle: mais ladicte liqueur n'est propre à preparer les viandes. Vers Patara pays de Lycie y a vne fontaine l'eau de laquelle est comme du sang. Et aussi tout contre lapisie promontoire, on voit vne fontaine qui produit quantité de sang, lequel estant vne fois putrescé

fend vne telle puanteur, qu'on ne sçauroit nager sur la mer; ce dit Aristote au lieu preallégué. Le mesme au mesme liure assure qu'en Sicile, à la demeure des Cyclopes, il y a vne fontaine qui produit vne eau fort claire, & belle: mais elle tue incontinent celuy qui en boit. La cause de cela saint Anselme au mesme liure que dessus dit estre pource que les serpents qui sont es lieux voisins, enueniment l'eau: où bien elle se rend venimeuse, à cause du lieu par où elle passe. De la aussi peut proceder ce qu'est recité par Tartaretus liu. 2. & Isidore d'une autre fontaine qui abbrege la vie à l'homme: d'autres qui guarissent de beaucoup de maladies.

En Sicile y auoit vne fontaine nommee Camarine, laquelle si on touchoit ou remuoit aucunement, elle s'enfloit incontinent & iettoit vne escume bruyante. D'où est venu le prouerbe entre les Grecs, *Ne remue point camarine*, au 4.^e liure des Epigrammes Grecs.

Ne mouue Camarine, ell'est mieux reposée,

De peur que la brouillant, elle ne soit haussée

Aux bains de Bade pres du Rhin qui sont bouillans, si vous y iettez vne poule desrobée elle ne se plume pas dans cette eau: Si elle est vostre sans larrecin elle se plume incontinent.

Philostate liure premier de la vie d'Apollonius, dict qu'aupres de Thiane ville située en

la Cappadoce, il y a vne fontaine, dont l'eau est froide, & neantmoins boult comme si elle estoit chaude. Le pariure qui en boit pert l'usage des yeux : celuy qui iure vray s'en trouue bien. En Pologne pres de Craconie en la vallee de Carpath, y a vne fontaine dans l'eau de laquelle le fer trempé deux ou troisfois est fondu & chāgé en cuiure rouge. Pres de celle là y en à vne autre qui faict mourir ceux qui en boient. Et non gueres loing de là y en à vne troiesime, l'eau de laquelle soudain qu'elle à passé le bord, est changée en pierre, cedit Vadianus. En l'Épire au lieu qui s'appelle Dodone y à vne fontaine froide, qui esteint les flambeaux allumez, & allume ceux qui sont esteints, si vous les plongez dedans. Pline liure 2. chap. 103. en Ilirie y a vne fontaine froide, sur laquelle si vous estēdez des vestemēs, ils sont incontīnēt embrasez de flāmes. En Arcadie, y a la fontaine Sryx si froide, qu'elle tuē prōptement comme dit Arian, & Plutarque en la vie d'Alexandre, qui mourut pour vne goutte de cete eau, que Cassander meit en son vin. En la ville de Colophon, y a vn lac d'Apollon Clarius, qui faict dire ce qui est à aduenir à ceux qui en boient. Pline au lieu susdit selon Cardan liu. 2. de la subtilité. De là le Rhin on à veu d'autresfois vne fontaine pres le bord de la mer l'eau de laquelle faisoit tomber toutes les dents.

dents. Tels & semblables maux, & incommoditez peuuent suruenir de quelque venin, & mauuaise qualité : comme aussi le bien, profit, & commoditez de plusieurs autres, procedent de quelques proprieté salubres, desquelles sont participantes les eaux, selon les lieux par ou elles passent. Les bains chauds de Baye en Italie, de Plumiere ou Plombieres en Lorraine, & autres lieux, sont trop communs, & pourtant ie me deporte d'en parler.

Rodiginus liure 10. chap. 59. dict que en quelque partie de la Gaule, y a vne fontaine qui rend douce armonie, & chât musical. En Lombardie, en fossioyant pour faire des puy, l'on rencontrent souuent de l'eau qui est salée, & la cuisant l'on en faiçt du sel : L'eau pareillement se rend salée quand elle passe par la chaux, ou par du plastre. La raison est, comme nous auõs dict cy deuât, pource que les eaux des fontaines, passans par les conduicts de la terre, reçoient l'impression de la qualité du terrouer, ou mine par où elles coulent, comme dit Moja ex Plinio liu. 31. chap. 4. Comme passant par des lieux sablonneux se rendent douces. Ainsi est de noz eaux des fontaines de Pougues, lesquelles sortent de la mine du vitriol, en quelques parties sulfuree, & ferruginee. Nous les trouuons en beuuant picquantes, & acides, & astringentes,

s'approchant du goust d'encre à escrire où il y
 entre du vitriol. Plin au liure 31. de son histoire
 naturelle, semble auoir remarqué vne fontaine
 presque semblable à celles-cy de Pougues, tant
 pour la qualité & vertu, que pour autres con-
 ditions, en vne ville en la France qu'il appelle
 Tungri, selon la descriptiō qu'il en a fait disant :
*Tungri ciuitas Gallie fontem habet insignem, plurimis
 bullis stillantem, ferruginei saporis. Quod ipsum, non
 nisi in fine potus intelligitur. Purgat hic corpora : ter-
 tianas febres discutit : calcurumque vitia : eadem aqua
 igni admota turbida fit, ad postremum rubescit.* Voila
 pourquoy aussi nous voyons sortir telles, & plus
 grandes commoditez, & remedes salutaires de
 l'vsage de l'eau des fontaines de Pougues. En
 quoy est facile à coniecturer & cognoistre que
 l'eau reçoit ses proprietéz, & vertus des mines,
 ou matieres cy deuant escrites, par lesquelles
 elles ont accoustumé de couler & passer.

Combien l'eau est necessaire à l'homme

CHAPITRE III.

Auant qu'entrer au discours de la necessité
 de l'eau il sera bon de sçauoir, que les Phi-
 losophes prennent le mot de necessaire, en qua-
 tre façons. La premiere est selon la matiere,
 cōte quand on diroit, l'homme necessairement
 entendra. La seconde, selon la forme comme si

l'on assure qu'à l'homme est nécessaire d'estre participant du rire, & admiration. La troisieme, suivant la cause efficiente, comme quand on dict, qu'il faut nécessairement que la chose soit pousse par quelqu'un, laquelle nous voyons se mouvoir. Finablement selon la fin : & lors se peut entendre en deux façons. La premiere est avec condition, comme un cheual est nécessaire à l'homme, pour plus facilement paracheuer un voyage, toutesfois s'il veult il le fera sans iceluy, mais non pas si aisément : Ou bien la chose se dit nécessaire absolument, sans aucune condition, come pour obtenir la felicité eternelle, la grace de Dieu immédiatement est nécessaire, sans laquelle on n'y peut aucunement paruenir. En cette signification pouuons nous dire l'usage de l'eau estre nécessaire, pour la conseruation de la vie de l'homme, sans laquelle ne pourroit longuement subsister. A quoy se rapporte ce que dit monsieur Duret, lequel en son liure premier sur les Coaques d'Hippocrates, assure que cela vraiment est appelé nécessaire, d'où la vie de l'homme est maintenue, & substantee, c'est à dire, d'où la faculté viuifiante sort, & d'où est apportée la vigueur & force pour conseruer la vie. *Est autem, inquit, viuifica vis, neētar illud sanguinis, & spiritus consociati vitali principio siue humido primigenio, spiritu & calore perfuso.* Quinc

se peut aucunement maintenir en son essence, sans estre entretenu, & nourry tant de viandes solides, que de l'eau & de l'air : tesmoin Hippocrate & Galien qui asseurent que pour entretenir cette humidité tant necessaire, qui est le nectar de nostre vie, trois choses sont entierement requises: l'air le boire, & le manger: l'vsage desquels doit estre libre pour la conseruation de la vie humaine. Voila pourquoy beaucoup de Philosophes qui se sont essayez curieusement de rechercher la vraye essence des choses naturelles, ont attribué vne telle vertu à l'eau, qu'on l'a estimee estre le principe, & commencement de tout ce qui est naturel en tout l'vniuers. Entre lesquels à esté vn Thales Milesius, Prince des Philosophes de la secte Ionique, cōme Plutarque raconte, qui semble auoir prins cette opinion d'Homere, qui appelle l'Océa le pere & Thetys la mere de tout l'vniuers. *Thales & Milesius Sacerdotes Ægyptij, & Pindarus ex humore omnia constare dixerunt Alexander ab Alexandro lib. 5. dierum genialium cap. 9. ex plutarcho lib. 3. de placitis c. 3.* D'autres iugent que la seule eau peut seruir pour tout autre element: ce qu'au temps passé les Prestres des Ægyptiens se sont efforcez de monstres, veu qu'aucc certaines & grande ceremonies, ils auoient accoustmé de couurir la cruche, comme il a esté pourtraict par Vitruuius.

Les Prestres anciens de la seigneurie de Rome, ont mis deux principes de la nature, le feu, & l'eau: prenant le feu pour la cause efficiente, & l'eau pour la matiere. Voila pourquoy la marque & signe d'une nouuelle mariee estoit l'eau, & le feu, comme euident & heureux argument de succession & lignée. Et pourtant Hesiode a dit, que la Deesse Venus estoit sortie ee l'escume de la mer, & pour cet effect à esté appelée des Grecs Afroditi. De cette opinion ne s'esloigne pas Hippocrate en son premiet liure de la Diete, qui dict. *Aquam omnia per omnia nutrire, opera enim quatuor qualitatum, quæ in igne, & aqua insident generantur omnia, & corrumpuntur quacumque generari, & corrumpi possunt.* Ce que le Philosophe confirme, quand il dit, que par la chaleur & moiteur toutes choses sont engendrees, & nourries, comme appert és semences qui ne peuuent fructifier, si elles ne sont premierement amoities d'eau, ou de rosee de l'air, & puis eschauffees par la chaleur naturelle, ce qui est plus gros & terrestre se conuertissant en racine par la chaleur: Et cette racine par son humeur & par sa chaleur attire à elle l'humeur, qui luy est propre de terre, & le conuertit à son nourrissement: Et ce qui ne luy est necessaire, elle enuoye contre-mont, puis au cœur, apres en la fleur, & enfin au fruit. Et par ce appert-il que l'eau & moiteur

est mere, & nourrice de toutes les choses qui croissent, & leur donne en longueur, largeur, & profondeur accroissement. D'avantage, elle restaure, & repare és corps qui croissent ce qui est perdu dedans eux du nourrissement de nature par la chaleur qui les gaste. Les corps periroient s'ils n'estoient restaurez par la moiteur, qui attrempe la chaleur. Oultre plus, l'eau est la garde, & conseruation de toutes choses qui sont souz le ciel : car si elle n'estoit, si grande secheresse seroit sur la terre, & en l'air, par la reflexion des rayons du Soleil, que tout brusleroit. Et tient les parties de la terre ensemble, qui est si seche, que sans icelle elle seroit desunie. Finablement l'eau purge, & nettoye : car par où elle passe, si elle y trouue quelque ordure, l'emmene avec elle. Il semble (veu ce que dit Pline au 3. liure de son histoire naturelle) qu'il ne faut faire aucun doute, que les opinions de quelque Philosophes cy deuant mentionnees, ne soient vrayes, veu qu'il asseure que l'eau à preeminence, cōmandement sur tous autres elemens : car l'eau, dit-il deuore la terre, tue le feu, & s'attribue la superiorité du ciel. Qu'y a il plus admirable que de veoir les eaux loger dessus l'air, & icelles tombant estre la cause que toutes choses croissent, & naissent sur la terre ? Les bleds s'engendrent, les arbres vivent, toutes les vertus finablement qu'on voit

sortir de tant de varietez de terre, c'est tout par le benefice de l'eau. Voyez aussi combien est necessaire oultre plus le boire à l'homme: Il arrose, & amoitit le corps qui est sec: & si amolit, & restaure ce qui est dur dedans, & porte la viande aux parties qui en sont loing, là où elle ne pourroit passer. De là nous pouuons doncques iuger, & cognoistre combien l'eau peult estre necessaire pour la conseruatiō de la vie humaine, veu qu'elle restaure l'humeur, & chaleur radicale, ou cōsiste le fondement de nostre vie: veu que par elle, & d'elle tout est nourry, & engendré: veu que les anciens l'ont mise en telle preeminence, & superiorité, que de l'appeller le principe, le pere, la mere des choses naturelles, Ne nous esmerueillons point dōcques, si de la vertu, & energie de l'eau des fontaines de Pougues nous voyons iournellement sortir tant de beaux, admirables, & diuins effects. Pour la preuue desquels, semble qu'il suffira en rapporter certains exēples en diuerses maladies, & diuers subiects dont i'ay faict traicter les malades, & leur ay donné aduis d'vser desdites eaux de Pougues: Puis avec vn grand cōtētemēt, & plaisir s'en sont retournez en leur maison gueris: & rendent grāces à Dieu iournellement du bien souuerain qu'ils en ont receu. Le passeray sous silence vne infinité presque d'autres: Le nombre desquels

seroit trop long, & ennuyeux à d'escrire, & au
lecteur pour les lire, ayât d'autres plus serieuses
occupatiōs. Veu que d'autrepart, par ceux cy
l'on pourra aisement colliger, & cognoistre le
bon, & heureux succez, & aduancemēt de con-
ualescence que plusieurs autres griefuemēt ma-
lades en ont obtenu du mesme remede : & tous
les iours en la saison qu'il appartient en recoiuēt,
comme à vn chacun est assez notoire.

Observation premiere de l'an 1583.

Combiē que la verité se soustiēne d'elle mes-
me sur son fōdemēt, comme vn cube par-
faict. Toutefois semble qu'on luy peult donner
quelque lustre, pour la rēdre plus notoire, & co-
gneue à plusieurs qui par cy deuāt en auroient
esté esloignez. Et ce principalement lors qu'elle
est declarée par le rapport, & exemple de quel-
que personnage illustre & vertueux. A ceste
occasion en ensuiuant la deliberation prinse, de
colliger les plus notables obseruations des ma-
ladies guaries par le seul vsage de ladicte eau
des fontaines medicamenteuses de Pougues, de
puis plusieurs années m'a semblé bon les rendre
plus approuuées, & la verité de leurs effects plus
notoire à chascu'vn, en descriuant icy le pre-
mier exemple, & tesmoignage du soulagement
& guerison que nostre Reuerendissime Prelat,
Messire

Messire Arnould Sorbin Euesque de Neuers, & predicateur du Roy, d'un temperamēt iouial, & sanguin, à présent aagé de soixante & dix ans, ou enuiron, en a faict & receu. A bon droit, dis ie, le premier lieu luy doibt estre defferé, considerant la dignité, & rang qu'il tient en l'Esglise, qu'aussi de ce que Dieu luy a faict la grace, d'auoir le premiet essayé en nostre temps ledict remede. lequel ayant esté extrêmement malade l'an 1582. & par plusieurs fois au parauant d'une colique pierreuse, accompagnée ordinairement de fiebre, suppression d'vrine, catterre, & autres pernicioeux accidens, & symptomes ennuyeux, lesquels n'auoient esté corrigez par aucun remede artificiel sinon par la vertu de ce seul remede naturel, s'estant accoustumé d'vser de ladite eau de Pougues tous les ans en Esté le matin à ieun, la quantité qu'on luy prescriuoit estre necessaire, espiaut la saison propre, les beuant en sa maison Episcopale à Neuers, sans aller sur lieu: Toutesfois puisees le matin, & deux heures apres ou enuiron beues, transportées dās des bouteilles de verre bien & deuement bouchées, dont il en a ressentý vn merueilleux profit, & grand contentement, veu que depuis il n'a esté tourmenté, ny mesmes ressentý aucune douleur nephrytique, ny difficulté d'vrine, les reins, vretères, vessie, & vrecte, & autres

parties ayans esté corrigées; en prenant chascun an durât quinze ou vingt iours en saison chaude, & seche. Et a continué ledit remede par l'espace de dixhuiſt, ou vingt ans, ou enuiron. Preune assez suffisante, pour monſtrer que ladite eau, non ſeulement, oſte, incise, & deterge la pituité glaireuſe craſſe & viſqueuſe, ſable grauier & calcul contenu dās leſdites parties, ains paſſe plus auant par ſa vertu, ſubtilité, & tenue partie corrige l'indispoſitiō & oſte le leuain & matiere, qui pourroit engendrer & produire en apres d'autres.

Obſeruation ſeconde l'an 1590.

NOble & venerable homme, meſſire Iean de Rophinac, Doyen de l'Egliſe de ſainct Cire à Neuers, aagé de trente cinq ans, ou enuiron, apres auoir enduré l'espace d'un an, par certains interualles, vne douleur peſante, à la region des reins avec vn ſentiment, parſois poignant en façon d'aiguillōs ladite douleur eſtoit fixe, & immobile, ſes vrines au commencement tenues, ſubtiles, & claires, dans le corps deſquelles on voyoit du grauier, & ſable, avec vne volonté de vomir, enſemble vne ſtupeur, ou endormiſſemēt de la cuiſſe, du coſté de la douleur nephritique. Au moys de Iuin 1590. (tous ces ſignes, & ſymptomes pathognomoniques du

calcul, ou pierre dans les reins considerez) il
 vſa de quelques remedes propres à ſa maladie,
 temperament, & ſaiſon, le l'endemain matin de
 l'eau de la fontaine ſainct Marcel de Pougues,
 qu'il ſeit apporſer en ſa maiſon audit Neuers, le
 ſecond iour en ayant beu, fit quantité de ſang
 meſlé avec l'vrine, ce qui luy donna quelque
 crainte, ſur la remonſtrance qu' on luy fit, que
 cela pouuoit proceder de la rupture de quelque
 petite vaine dans les roignōs, que la pierre ayant
 eſté diſloquée, & esbranlée par leſſicace de ladi-
 te eau, auoit rompue, (Hippocrates aph. 74. 4.
 apho. *qui inopinanter ſanguinem meciunt, ijs à reni-
 bus venulam ruptam eſſe ſignificatur.*) Apres auoir
 continué ſeulement autres deux iours, en vrināt
 ietta vne pierre de la groſſeur d'vn noyau de
 prune de damas, vn peu longue, tirant ſur le
 rouge : qui luy a apporté telle conſolation que
 le ſang, enſemble toute douleur, & autres acci-
 dents incontinent apres ceſſerēt : & depuis n'a
 ſenti aucun mal en ladite partie.

Maladie ſemblable guerrie. Obſeruation 3. l'an 1520.

IE ne doy (ce me ſemble) laiſſer en arriere vn
 autre exemple d'vn de Sully ſur Loire, aagé
 de quarante ans, ſubiect à meſme maladie, qu'
 a eſté l'eſpace de trois ans beaucoup plus cruel-
 lement tourmenté : Lequel apres auoir vſé de

tous les remedes, qui luy ont esté ordōnées par les medecins, qu'il a peu, & sçeu trouuer, n'ap-
perceuant allegement que biē peu à sa douleur
nephritique, s'en vint boire des eaux de Pougues
l'année 1590. au moys d'Aoust, & au mesme
moys l'an 1591. en fit de mesme, beuuant l'es-
pace de trente iours, tous les matins vingt verres
chasque verre tenant quinze onces (qui disent
trois cens onces) chose rare, oultre la coustume
pour la quantité. Ce qui luy a apporté vn tel alle-
gement, qu'il a rendu par la verge, depuis vn an
ēuiron cent pierres de la grosseur chascune d'vn
noyau de prune de damas. Et est à present deli-
uré de l'affliction, & tourment continuel, dans
lequel il estoit ordinairement plongé.

Observation quatriesme de l'an 1593.

AV moys d'Aoust, en l'an 1593. Frere Be-
noist du Buillon, Docteur en Theologie,
Gardien du couuent des Cordeliers de Sens,
Predicateur en ladite année à Gien sur Loire,
aagé de 49. ans, d'vn temperament bilieux, ayā
esté souuēt, par l'espace de huit, ou neuf ans,
grandement persecuté d'vne douleur Nephriti-
que, & colique pierreuse, arriua à Neurs, où,
apres y auoir prins vne once de casse, avec vne
dragme de Rhubarbe, s'achemina à Pougues, où
estant commença le lendemain suiuant sur les fix

heures du matin, à boire du premier abord contrariant à la coustume, & methode, de son propre mouuement, dix verres d'eau de la fontaine S. Marcel, chasque verre tenant douze onces, qui estoit en tout six vingt onces, laquelle quantité il continua par neuf iours seulement, les rendât bien, faisant operation, tant par les vrines, que par les selles; dans, le quatriesme iour, de faict que durât ledict temps de neuf iours, il rendit par la verge en vrinant, vingt pierres, & ce par diuerses fois, s'as douleur, de la grosseur chascune d'un petit poix. Ainsi s'en retourna avec un grand soulagement.

Observation cinquiesme.

MAistre André Violon de la ville de Cosne sur Loire, aagé de quarente cinq ans ou enuiron, d'une habitude plethorique, sanguin de son naturel, alla à Pougues sans autre formalité ny preparatiō, au moys de May, saison lors fort pluuieuse, mal propre pour l'usage desdictes eaux desquelles il vsa par l'espace de dix iours, en ayant prins le premier iour cinquante onces, le second soixante, le troisieme septante, le quattiesme nonante, laquelle quantité il beut iusques au dixiesme iour, sans la pouuoir rendre, ny en ressentir aucun profit. Quoy voyant, de son propre mouuemēt, & sans prandre aduis de persōne

il desista d'en boire, & s'en retourna à Cosne en sa maison, où ayant seiourné quelques deux ou trois iours, disnant en compagnie, luy suruint, estant à table volonté d'vriner, de telle sorte qu'il n'eust le loisir de se leuer de table, qu'un flux d'urine ne le surprint, rendant à l'instant, plus de trois pintes d'eau, avec sept pierres, les vnes de la grosseur d'un petit noyau de cerise, les autres d'un grain de coriandre, & se trouua beaucoup allegé. Non content de cela considerât & attribuant ce bien luy estre suruenü, par l'usage, energie, & operatiõ des eaux de Pougues, qu'il auoit n'agueres beues, sans les auoir rendues, à tout le moins bien peu, se proposa de retourner audict lieu de Pougues, au mois de Iuillet suiuant, le temps, & la saisoõ estant plus propre, chaude, & seiche, s'estant vn peu mieux disposé & preparé, où il beut de l'eau de la fontaine S. Marcel, enuiron cent onces chascun matin l'espace de quinze iours, par bon ordre, suiuant bon regime : durant lequel temps il randoit chascun iour presque la mesme quantité d'eau qu'il beuuoit. Ainsi il fit en vrinât par diuerses fois, en diuers temps, enuiron soixante & dix pierres, de la grosseur que dessus, & en la presence de plusieurs gens d'honneur dignes de foy, estant lors à Pougues.

*Sixiesme exemple de l'an mil cinq
cens nonante quatre.*

VN ieune enfât de l'aage de neuf ans, de ce pais de Niuernois, apres auoir esté grandement persecuté, durant dix ou douze moys, d'vne difficulté d'vrine, avec douleur aux reins, & coliques pirreufe, son pere voyant le temps propre au moys d'Aoust, l'enuoya à Pougues, où estant, apres auoir prins six dragmes de casse, avec demy dragme de Rhubarbe, le lendemain commença à boire de la fontaine S. Marcel, la quantité de vingt quatre onces. Le lendemain du matin, il en beut trente onces, & ainsi augmanta de six onces chascun matin, iusques à la quantité de cinquante quatre onces, laquelle ayant continué iusque au dixiesme iour, luy suruint vne grande difficulté d'vrine, causée par l'obstruction que quatre pierres produisoient, qui estoient descendues des reins dans l'vretre, ou canal de la verge, estans rang l'vne apres l'autre. De sorte que ledict enfant endurant lors de grandes douleurs, il se presenta fortuïtement à l'instant vn honeste homme Chirurgien, qui esmeu de pitié, le voyant si fort tourmenté, visita les parties dolentes, où il apperceut au bout de la verge, la pointe d'vne des pierres, laquelle ayant tirée, avec ses pincettes, se presenterent l'vne apres l'autre,

trois autres cōsecutives, chascune presque d'une mesme grosseur, sçauoir d'un noyau de cerise de figure ouale, & continua apres à boire ladicte quantité, par l'espace de six iours sans rendre pierre ny grauelle, vrinant sans aucune douleur. Ainsi se retira guery en sa maison.

Semblable colique pierreuse guerrie par la vertu de ladicte eau transportée euuiron cent lieues loing de sa source. Observation 7.

Monsieur de Bernāpré, gouuerneur du Chasteau de Saumur, aagé de 76. ans, bilieux de son naturel, suiuet (bien souuēt) à vne grāde douleur pesante, & fixe aux lombes, sur la region principalement du rein dextre, s'estēdāt par fois iusques à la cuisse, ou au testicule, qui est au mesme costé avec vne difficulté d'vrine, laquelle se presentoit tenue, & aqueuse au commencement, peu apres, espaisse, & sablonneuse, quelquefois sanguinolante, & par fois sētoit vne ardeur qui l'esmouuoit à vriner souuent, le prouoquant à vomir : Se voyant ainsi cruellement affligé sur le commencement d'Octobre 1594. & à cause ne pouuant se mettre en chemin, tant de son vieil aage, desia fort débilité par les douleurs endurees, que pour raison de l'indisposition du temps automnal, & pluuieux, enuoya querir dudit Saumur iusques au village de Pougues, distant

distât environ de cent lieues, de l'eau S. Marcel, trente bouteilles : de laquelle en ayant vſé en ſa maiſon ſuiuant l'ordre, regime & façon accouſtumez, ſe trouuât beaucoup allegé des afflictions ſuſd. ctes, & ayant beu environ la moitié de la dicte eau, il rendit deux pierres par la verge en yrinant, de la groſſeur d'vn poix chacune. Conſiderant auoir receu guerison par l'vſage de ladicte eau transportée, encores qu'elle ne ſoit pas d'vne ſi grande vertu & efficace, comme eſtant prinſe ſur le lieu, il delibera afin de ne retomber point en telle maladie à l'aduenir, de ſe tranſporter audict lieu de Pougues, l'Eſté enſuiuant : Où eſtant il beut durant le mois d'Aouſt, & la prenant mon aduis pour ſe preparer, m'a faiât le rapport verballemēt de tout ce que deſſus, qui contient verité.

Colique venteuſe, accompagnée d'vne douleur, & debilité d'eſtomach guerie. Obſervation viij.

VN honneſte homme, nommé mōſieur du Pleſſis du pays de Berry aagé de vingt ſept ans, d'vn temperamēt melancolique, apres auoir enduré, par l'eſpace de deux ans, de grandes douleurs, tant d'vne colique venteuſe, que debilité d'eſtomach, qui luy produiſoit vne fièvre ſymptomatique, foibleſſe, & violants vomifſemens, quelque remede qu'il euſt ſceu vſer

par le passé, s'achemina à Pougues au mois de Septembre où il vfa, par l'espace de vingt iours, de l'eau de la fontaine saint Marcel, suiuant le regime qui est requis, s'en trouua geury, admirât le profit, & contentement qu'il ressentit en si peu de temps, que tant de remedes qu'il auoit vsé auparauant à tout propos, par longue espace de temps, ne luy auoient sceu rapporter.

Colique Nephritique, ensemble deux malins vlcères, assis en la region du perineon, guaris.

Observation ix. en l'an 1585.

LE Procureur fiscal de la Chastellenie d'Antreïn nommé maistre Mathurin le Maire, en Donziois, aagé de trente sept ans, estant sujet, & cruellement, par interualles, affligé d'une colique Nephritique, des son ieune aage, accompagnée de douleurs extremès, au rein senestre, s'estendant iusques à la region de l'umbilic : lequel quand il vouloit vriner sentoit vne grande cuiseur dans la verge : son vrine estant parfois avec beaucoup de sable, d'autresfois avec quantité de pus (signe, & symptome du calcul) qui luy auoit produit vn vlcere au rein : dont il sentoit de telles douleurs par toutes les parties des rognons, & du ventre inferieur, qu'il ne pouuoit qu'avec grande difficulté les supporter. Pour à quoy remedier, il vfa de tous les re-

medes, par l'espace de vingt ans, qu'il luy fut possible de trouuer, tât par l'aduis des medecins qu'il peust choisir, que par quelques remedes que le commun peuple a accoustumé d'vser : dont il ne peut estre que bien peu allegé. De sorte que ceste douleur, ou excrement superflu, & corrompu, sortit & s'engendra vn absces, & tumeur sur le perineon (qui est la region, & espace entre les genitoires & le fondement) de la grosseur d'une pomme de carpendu, qu'il fit percer sept semaines apres par l'aduis des Medecins, dont il sortit grande quantité d'apostume, l'acrimonie, & corruption de laquelle fit sept petits pertuis, dans le canal de la vessie, de sorte que quand il vouloit vriner, l'eau sortoit, tant par lesdits pertuis, que par la verge : endurent vn grand tourment de l'ardeur, & acrimonie de l'urine, de telle sorte qu'il ne pouuoit demeurer ny assis, ny debout, & durant six mois ne peut endurer ses chausses vestues. Au mesme endroit tirant vers le fondement, luy survint ue autre tumeur, qu'il fit percer aussi de mesme, s'approchant bien pres du Rectum, ou gros boyau : par lequel aussi l'urine sortoit : de maniere que de la verge iusques au fondement, furent nombrez dixsept pertuis, par lesquels lors qu'il vrinoit, l'eau fluoit, qui luy continuerét deux ans, ne pouvant marcher qu'avec grande difficulté, appayé

sur deux potées, iusques à ce qu'il se fit porter à
 Pougues, l'an 1585. lors que le Roy Henry troi-
 sième, de tres-heureuse memoire y estoit pour
 boire desdites eaux. Où tous les Medecins, &
 Chirurgiens de sa Majesté le visiterent, sans luy
 faire vser d'autres remedes, que de quelque me-
 dicament benin & familier, pour le disposer à
 vser desdites eaux, il beut de la fontaine de S.
 Marcel, l'espace d'un mois, cinq pintes de Paris
 tous les matins, qui diste huit vingt onces : en
 estuant ses vlcères, & les parties malades tous
 les iours deux fois de la mesme eau, soir & ma-
 tin, s'en estant retourné apres en sa maison, sur
 le mois de Decembre ensuiuant, vn de ces vl-
 ceres, & fistules commença à dessecher, & gua-
 rir, Ainsi six ou sept pertuis furent consolidez &
 bouchez, l'annee apres ensuiuant, au mois de
 Iuin 1586. retourna audict Pougues, & conti-
 nua l'usage de l'eau de ladicte fontaine de S.
 Marcel, à la façon que dessus par quarante iours.
 Six mois apres toutes ses fistules, vlcères, & per-
 tuis, par lesquels l'vrine sortoit, furent nettoyez
 bouchez, & consolidez : Et faict à present son
 vrine naturellement par le conduit de la verge,
 sans douleur aucune de colique, qui auoit per-
 secuté & affligé l'espace susdit de vingt deux
 ans, faisant parfois quelque petite pierre, ou
 grauiers. Et à present ses reins sont si bien

nettoyez, qu'il n'a faict depuis ny sable ny pierre, ny ses vrines ne se presentent plus purulentes : Et va à pied, & à cheual, comme bon luy semble, sans endurer mal aucun aux parties, qui ont esté si long temps affligez : sauf que par fois en vrinant, il sent encores vne cuiseur & ardeur d'urine, comme luy mesme n'a rapporté, & en ay esté ternoing oculaire.

Calcul ou pierre qu'on a trouuee brisee dans la vessie, par la vertu & efficace de l'eau desdites fontaine l'an 1594.

VN ieune escolier, de l'aage de seize ou dix-sept ans, de la ville de Bourges, d'un temperament melancolique, ayant la pierre dans la vessie, qui le rendoit suiet à vriner inuolontairement, dict des Latins, *Mictus inuolontarius*, des Grecs *apraeretos*, qui luy auoit continué par l'espace de quatre ans, vrinant à tout propos, tant en dormant que veillant sans y penser : lors qu'il deliberoit vriner il s'étoit quelque difficulté, avec douleur au bout dela verge, auparavant que pouuoit redre l'eau, par fois sentoit un prurit au prepuce. Après auoir essayé tous les remedes possibles, tant vniuersels, interieurs, que particuliers, comme par sondes, diuerse iniections, & fomentations, & autres especes de topiques. bien & methodiquement appliquez, sans

en recepuoir alegement : On l'enuoya en ceste
ville, au moys de Iuin, ou ayant esté deuement
preparé, le iour ensuiuant s'achemina à Pougues
où il beut durant trête iours, de l'eau de la fon-
taine S. Marcel, sans rendre pierre aucune, ny sa-
ble mais seulement du phelgme espais & glai-
reux, avec quelque peaux semblables à la pelure
de prix estant blanche, & en beuvoit chascun
matin enuiron quatre vingts onces, par ordre
comme il appartient, dont il en ressentit vn grãd
proffit. Car il retenoit bien son eau, vrinant na-
turellement quand bon luy sembloit, sans dou-
leur ny difficulté aucune, de sorte qu'il s'en re-
tourna fort content avec deliberation (comme
on luy auoit conseillé) d'en vser derechef, tout le
moys d'Aoust, pour confirmer sa guerison. Mais
(selon ce que plusieurs digne de foy m'ont rap-
té depuis, & comme on m'a escrit de Bourges)
ayant negligé la resolution prinse, luy suruint en
sa maison vne difficulté d'vrine avec douleur,
& mesme symptomes qu'auparauant, l'ayant fait
sonder, fut arresté par gens en cet estat bien ex-
perimentez, de le mettre entre les mains de l'o-
perateur, ou Chirurgien pour le tailler. Ce qui
fut fait, sans pouuoir extraire, ny amener au-
tre chose, que quelque petite gravelle. Et côm-
me ordinairement telle operation est dégereuse, pour
beaucoup de raisons, sur ce fait la fiebre con-

tinue le va saisir, dont il en mourut, Et l'ayant fait ouvrir pour sçauoir au vray la cause de sa maladie, on trouua seulement dans la vessie la pierre qui luy auoit causé les accidens, & symptomes cy deuant specifiez, brisée, & reduite en pieces. Ce qu'on peut attribuer & coniecturer estre suruenü, par la vertu. & efficace de ladicte eau medecinale de Pougues, de laquelle il auoit vſé quinze iours auparauant.

Nephritique avec tumeur de rate, l'an 1599.

AV mois de Iuillet, audit an, mōsieur Berger, l'vn des sept prestres de l'Eglise Cathedrale de S. Cire de Neuers, & Sacristain, n'estant du tout remis en sa pristine sāté d'vne fiebre continue, symptomatique, procedant des douleurs d'vne colique nephritique, & pierreuse faisant par fois en vrinant quantité de pus & sable, avec des phlegmes glaireux, & visqueux, en l'aage de vingt neuf ou trēte ans, melancholique de son naturel, la rate & hypochondre senestre enflé & tumefié avec douleur, se fist porter à Pougues, & chasque matin à la façon accoustumée, beut de l'eau de la fontaine Saint Marcel, la quantité que ie luy auois ordonné, en ayant vſé neuf iours, la douleur tant dudiēt hypochondre, que du rein gauche s'augmentant, fut en deliberation de les quitter, sans l'aduer-

issement qui luy fust fait de continuer pour quelque iours. Dans deux iours apres auoir beu le matin, ladicte eau faisant operation, rendit par la verge avec l'vrine six vessie, ou chistes membraneus, vuides, de la grosseur d'une noisette, entre lesquelles s'en trouua vne entiere, laquelle estant creuee, fust remplie de bouë & ordure, le landemain il en fist encores quelques vnes, auquel iour se resentir beaucoup allegé, tant des douleur que tumeur de la rate, son visage qui estoit beaucoup decoloré, blesmé, & toute l'œconomie, & habitude du coprs fort changee, & alteree, en danger de tomber en cachexie, se remit en bon naturel, ses forces s'augmenterent de iour à autre, l'apetit & dormir, qu'il auoit perdu, restitué en bon estat, & du depuis s'est tousiours bien porté.

Autre Nephritique en la mesme année 1599.

Monsieur du Paiffaige, gouuerneur pour le Roy de Valence, aagé de quarante huit ans d'un temperamēt bilieux, ayant esté griefuement affligé par l'espace pe cinq ans d'une colique Eephritique, ou pierreuse vsa de l'eau saint Marcel, l'espace d'un moys audit ant au moys de Iuillet, obseruant deligemment toutes les cautions, ordre & methode requise audit remede : Il rendoit fort bien ladicte eau par les vrines, & luy

& luy esmouuoit par fois le ventre, luy donnant
 appetit pour māger mieux en ses repas, & le dor-
 mir plus agreable qu'auparauāt. Toutesfois il ne
 rendoit pierre ny grauelle aucune, durant l'vsa-
 ge de ladicte eau. Mais s'estant retiré en sa mai-
 son, enuiron vn mois apres, dans quatre iours il
 fit enuiron trois cens pierres de diuerses grādeur,
 les vnes de la grosseur d'un poix, d'autres d'un
 grain de coriandre. Ce que ie ne pouuois bonne-
 ment croire, sās l'authorité & tesmoignage dudit
 seigneur, lequel retourna de la cour, passant par
 Neuers, il me les fit monstrier par son homme de
 chambre, & ne voulust passer sans parler à moy
 pour asseurer, & confirmer ce qui est cy dessus e-
 stre veritable. L'année apres mil six cens, ledict
 seigneur au mois de Iuin, retourna audict Pou-
 gues pour vser dudit remede, pour rassseurer &
 confirmer sa santé.

Maladie semblable de l'an 1610.

AV mois de Iuillet, vn ieune garçon aagé de
 neuf, ans, de Bony sur Loire, apres auoir
 vſé trois iours à Pougues de l'eau s. Marcel, le pre-
 mier iour trois verres de six onces chacun, le se-
 cond iour six verres, le matin sur les six heures à
 ieun de mesme grandeur, & le troisieme iour
 huit. Trois heures apres vrinant, rendit vne pi-
 erre par la verge de la lōguer & grosseur de deux

febles conioinctes, & par apres continua à boire de ladicte eau, l'espace de quinze iours, sans ressentir aucune douleur, ny faire aucune pierre ny grauer, ainsi se retira en sa maison.

Debilité d'estomach en l'an 1588.

VN escolier du pays de Normandie, aagé de vingt quatre ans, doué d'un fort bon esprit estudiant à Bourges, fut malade l'espace d'un an & demy, d'une grande debilité d'estomach (ce que bien souuent aduient à ceux qui s'addonnent par trop aux lettres) ou il sentoit vne douleur, ayant la faculté concoctrice viciée & diminuée, ne pouuoit qu'avec difficulté digerer & cuire la viande qu'il receuoit pour sa nourriture avec volonté de vomir, sans trouuer goust aux viandes, dont toutes les autres facultez furent tellement lessées & interessées, qu'il s'en alloit sec, & tabide. Mais ayant ouy faire grande estime de la vertu des fontaines de Pougues, de son propre mouuement & aduis, s'achemina l'an mil cinq cés quatrevingt & huit en ceste ville de Neuers, où s'estant exactement préparé, & usé des remedes à luy propres & necessaires, pour redre le corps mieux disposé à l'usage de ladicte eau, se transporta audit Pougues, où il beut l'espace de vingt cinq iours, obseruant tousiours vn bon regime selon qu'il est requis. Il s'en retourna guarý, sans

ressentir aucune douleur dans son estomach, & ayant osté toute mauuaise habitude.

Semblable maladie guarie ioincte avec la chaleur de foye, de l'an 1590.

MEsmes effects a restenty vn honnestes gentil homme du pays de Limosin, suiection à vne mesme maladie, avec chaleur de foye, aagé de quarente cinq ans ou enuiron, lequel pour auoir receu allegement de son indisposition, ayant vsé durant le moys de Iuin, mil cinq cens nonante, de l'eau de Pougues il a tant loué & celebré sa vertu, & efficace, qu'à son exemple, & rapport plusieurs, suiection à de semblables maladie, son, venuz à Pougues boire. pour recouurer leur santé : desquels la plus grand part s'en sont trouuez de telle forte allégez, que ie les ay veu y retourner par deux diuerses années sur la fin du moys de Iuillet, receuât tousiours de plus en plus alienation de leur mal & douleurs, comme ils ont fait le rapport à plusieurs, & en rendent graces perpetuelles à Dieu.

Autres exemples en l'an 1593. avec melancolie hypochondriaque.

VN religieux de l'ordre des Celestins, de la ville d'Orleans aagé de vingt cinq ans, d'un temperament melancolique, ayant esté par l'es-

pace d'un an & demy fort trauaillé, d'une debilité d'estomach tardif a la concoction par sa froideur, & intemperie, procedant tant des causes antecedentes, & internes (ayant naturellement le vëtriculle vn peu debile avec chaleur de foye) que des causes externes, ou procatarriques, des viandes froides, & humides, ieusnes, & veilles, dont on a accoustumé d'vser en leur celibat, suivant leur reigle, comme les signes, & symptomes le demonstrent, qui sont les rots acides, ou aigres, le retardement de la concoction, le peu d'appetit aux viandes, le bruit, ou borgbonygme que les vents contenuz au ventricule, & intestins produisoient, le visage passe, avec les frequentes crachemens, & autres symptomes pathognomoniques des susdictes affectiōs, & maladies: qui estoient si grandes, qu'il tomboit en atropie, & marasme, endurât de grandes douleurs par toute la region de son estomach, principalement apres le repas, avec vne naulée, & horreur des viandes, combien qu'elles fussent de bon suc & facile digestiō, & ne pouuoit dormir, ny estudier, & mesmes vaquer à son office. Estant arriué à Pougues pour vser des eaux, pour cet effect le iour apres qu'il eut prins l'expressiō de deux dragmes de Rhubarbe, deuement infusée dans quatre onces de suc de roses, avec vne dragme & demie de Myrabolans y ayant adiousté vne once

de sirop de cichorée, cōpoïé avec Rhubarbe, le matin ensuiuant il vſa de la fontaine S. Marcel, par l'espace de vingt cinq iours, dont il a receu tel profit, que depuis il n'a senty mal aucun en son estomach, ny autre mauuais accidens en tout le corps.

Vne honneste Dame de noble maïſō, du pays de Champaigne, aagée de quarante ans ou enuiron, pour vne presque semblable maladie, principalement d'une debilité d'estomach, la faculté concoctrice estant fort depraüée, avec la douleur de ladite partie, procedāt de cause froide, de laquelle maladie elle auoit esté affligée par l'espace de quatre ou cinq ans, ayant beu & vſé tous les matins durant dixhuiēt iours, de ladicte eau medecinale de Pougues, s'en retourna en son pays entierement guerie.

Le descrirois icy quatre autres maladies de debilité d'estomach, produites de diuerſes causes. Deux autres d'vlcere au rein, & colique pierreuse Nephritique: & trois autres de colique ventreuse, qui ont receu guerison depuis deux ans en çà, par ce seul remede, ayant vſé l'espace de vingt sept ou trente iours de l'eau desdictes fontaines, les vns au mois de Iuin, d'autres au mois de Iuliet, ou Aouſt. mais d'autāt que ce ſōt des maladie semblable à celles qui ſont cy deuant eſcrites ie les lairray pour en rapporter de diuerſes à celle là.

VNe pauvre femme aagée de trēte ans, malade de l'espece d'hydropisie, qu'on nōme *Aquā intercutem*, *leucophlegmatia*, ou *Anasarca*, composee d'une matiere grossiere, & espendue sous la peau & parmy la substance charneuse: la marque, & inpression du doigt demouroit par tout le corps estant *œdemateus*, qui luy survint apres d'une fiebure, durant laquelle elle avoit par trop beu. *Ex intempestiva frigidi potatione iecur afficitur, refrigeratur statim, aquam intercutem inducit Gal. lib. 2. de facult. natur.* Et au liure de *Atra bili*: Laquelle vivoit de sō labeur & tranail, d'une vie sedentaire: les euacuations naturelles ne respondant point à propos, comme la nature & l'aage le requiert: qui n'avoit aucun moyen pour se faire penser, demanda aduis seulement pour estre purgée, auparavant l'usage de l'eau, de laquelle elle avoit deliberé de boire de sō propre mouvement, pour le rapport qu'elle en avoit ouy faire. Et en ayant beu trente iours au matin, à la façon qu'elle voyoit faire aux autres, guarit. Et tous les symptōmes, & accidens peu à peu cesserent.

Vn ieune garçon de la ville de Monbar en Bourgongne aagé de vingt ans, ayant esté grièvement malade d'une pluresie, tomba en vne mesme espece d'Hydropisie, que celle cy dessus

qui luy continua depuis le moys de Feburier 1602. iusques au moys d'Aoust, lequel guarit pour auoir vſé, & beu de l'eau de la fontaine S. Marcel, la quantité de cent onces chaſque matin, durant trois moys & demy : May, Iuin, Iuillet, & iusques au quinzième du moys d'Aoust. Vn autre pauvre, de meſme aage, affligé d'une ſemblable maladie, receut guerifon pour auoir beu durant vn moys ſeulement de ladiſte eau, en ladiſte année 1602.

Aſcites, autres eſpece d'hydropiſie guerie l'an 1591.

VNc damoiſelle aagée de vingt ſept ans, du pays de Vandomois apres auoir eſté malade durât neuf moys d'une fiebure quarte qui luy laiſſa vne tumeur, & enſleure dans la rate, ſes purgations eſtant deſreiglées, deuint hydropique, d'une eſpece d'hydropiſie qu'on appelle Aſcites, à cauſe de la ſemblance qu'elle a à la peau, d'un bouq quand il eſt preſque plein d'eau, d'autant qu'une quantité d'humeur ſereux, & aqueux, avec quelque vents ſ'acumulant entre le peritoine, la coiffe, ou epiploon & inteſtins, faiſt enfler, & rend tendu tout l'abdomen, ou ventre inferieur, de telle ſorte qu'il ſemble rōpre & creuer : procedant d'une debilité grande de la faculté cōcoctrice, & de l'intemperie du foye, rate ou obſtructions d'iceux, bien toſt apres, ſe voyant ainſi,

par l'aduis des medecins qui sont en son pays, l'ayant faicte bien preparer, s'achemina à Pougues, où estât print encores quelque petit remede pour estre mieux disposée: Ainsi beut de l'eau du premier iour d'Aoust dernier, iusques au sixiesme Septēbre, sans interruption, de toutes les deux fontaines selon l'ordre, & methode accoustumée: avec heureux succez, qu'elle s'en retourna entierement desenflee.

D'une semblable hydropysie Ascites, procedât d'une retention, ou rupptession des purgations, menstreuses fort desreiglées, ne gardant point leur type, & periode naturel, vne ieune femme de l'aage de vingt six ans, à esté malade, estant d'un temperament melancolique, d'habitude & constitution gresse & menue, de la ville de Sens: A ceste occasion arriuée à Pougues, l'an 1602. vfa durât le moys d'Aoust de l'eau de la fontaine de S. Marcel, ayant obserué exactement toutes les cautions deues, & accoustumées receut guerison audict lieu de sa maladie. Fault noter que par chasque nuit luy suruint vne grande sueur vniuerselle, dont elle se resetoit beaucoup allegée.

Autre hydropique guerie l'an 1595.

Germain Buissot, de la paroisse de Thoune Gen Bourbonnois, pres de la ville de Ialy, aagé de trente six ans, d'humeur melancolique,

apres

apres auoir esté malade d'une diarrhée, qui se
 changea en d'ysenterie, qui le molesta l'espace
 de sept semaines luy laissant vne iaunisse, la-
 quelle luy dura treize ou quatorze mois, de telle
 sorte qu'il tōba en vne si mauuaise habitude, &
 presque cachexie, que la température du foye fut
 si encrasie desreiglée, & deprauee, qu'elle luy
 produisit vn commencement d'hydropisie, ayant
 l'abdomen, ou ventre inferieur beaucoup tume-
 fié, & tendu avec les pieds, & les iambes enflées
 & œdemateuses. De faict, le marcher luy estoit
 tres difficile, luy produisant vn estime, & diffi-
 culté de respirer : Se voyant reduit en tel estat,
 apres qu'il fut exactement preparé par l'aduis, &
 conseil de messieurs les docteurs medecins de
 Moulins en Bourbonnois, s'achemina audict vil-
 lage de Pougues, au mois d'Aoust mil cinq cens
 quatre vingts cinq, où il beut neuf iours seule-
 ment de l'eau S. Marcel, neuf verres chascun
 matin, de dix onces chascun verre : dedans le
 cinquiesme iour l'enfleure commença de se di-
 diminuer, encores que les trois premiers iours,
 il ne les eust pas bien rendues, Toutesfois ayāt
 continué, & paracheué lesdits neuf iours, s'en
 retourna en son pays bien disposé. De sorte que
 dans vn mois apres, toute l'enfleure du ventre,
 pieds & iambes s'en alla, & à present marche li-
 brement, si bien qu'il m'est veñu trouuer en ma-

maison, en passant par ceste ville de Neuers le vingthuiſtième Nouembre, audict an, pour me rapporter l'heureux ſucces, qu'il a obtenu par l'vſage de ladicte eau.

Hydrops à mola vteri l'an. 1599.

FEu madamoiselle de Beaulieu âgé de vingt cinq ans, d'un tempérament phlegmatique ou pituiteux, du pays de Normandie, auprès de Verneuil, fuſt malade d'hydropiſie. Laquelle pluſieurs ont eſtimé, avec beaucoup de raiſons, procéder de la matrice, qui luy continua deux ans. Ayant le viſage decoloré, icterique, l'abdomen ou ventre inférieur, cuiſſes & iambes deſmeſurement enflées & tumefié avec vne grande difficulté de reſpirer, de ſorte qu'elle ne pouvoit repoſer, ny aucunement marcher, s'eſtant faiſte trāſporter à Pougues, preparée pour vſer de l'eau des deux fontaines, en ayant beu neuf iours? la plus grand part des tumeurs ou enſleures, & autres accidents & ſymptomes ceſſerent, & ſes fonctions naturelles remiſes à leur premier eſtat. Et le plus grand plaisir & contentement qu'elle pouvoit recepuoir, eſtoit à racompter ſa conualeſcence à vn chaſcun. Mais s'eſtant préſenté le bout d'un mola ou maſſe de chier deſfigurée endurcie, deſcendue à l'orifice du col de la matrice ſemblant vouloir ſortir hors, y fit appliquer &

mettre la main du Chirurgien pour faire l'extraction, & ne la pouuant tirer qu'à pieces, & morceaux, la fiebure l'ayant surprinse, mourut au cinquiesme iour à Pougues,

D'un vlcere dans les reins en l'an 1589.

L'An mil cinqcens octante neuf, le Sire Guillaume Bourgoïn, marchât de la ville de Neuers, âgé de vingtfix ans, au mois de May, 1589. se sentât fort affligé d'une douleur dessous les lombes, & principalement au rein dextre, avec vn, horreur ou frisson, & fiebure desreglée, accompagnée d'une pesâteur en mesme endroit lors qu'il se couchoit dessus le ventre, qui estoit coniecture de quelque Absces, lequel nature ayât cuit, & conduit à maturatiõ, rendoit en vrinant quantité de pus meslé parmy l'urine, laquelle estant rassise, le pus se presentoit à grande quantité au fond du verre, sans toutesfois puanteur aucune, ny douleur en vrinant avec quelque transitoire, & filaments meslez ensemble (symptome, & signe euidant du rongnon vlcéré) Hipp 4. aph. 76 aph *Quibus urina crassa existente, caruncula aut veluti capilli una exeunt, his à renibus excernuntur.* Ce qu'ayant considéré, & préparé le corps par diuers remedes, tant vniuersels que particuliers, selon que la maladie, forces & nature le requeroient, il s'en alla au village de Pougues, pour

boire de l'eau des fontaines, laquelle il continua l'espace de quinze iours, suivant l'ordre accoustumé. Ce qu'ayant fait, s'en retourna guery entierement, & depuis n'a senty douleur ny affection quelconque ausdictes parties, ny ailleurs, comme luy mesme m'a plusieurs fois rapporté.

De deux vlcères internes en l'an 1591.

VNe damoiselle du pays de Poictou, âgé de vingt quatre ans, d'un temperament sanguin, tendant en quelque partie au pituiteux, ayant esté grandement affligée par l'espace de huit ou neuf mois de deux vlcères, l'un situé en l'vretre ou canal de la vessie, qui auoit esté produit par la continuation de l'acrimonie du pus, & matiere qui fluoit ordinairement de l'autre vlcere, qu'elle auoit auparauant au rein d'extre, où elle sentoit des grâdes douleurs fixes & poignantes en toute la dicté partie du rongnon, sentant parfois douleur à la cuisse du mesme costé dextre, faisant des vrines purulentes, sanuieuses, espaisles, avec des filaments quelques iours, apres eut grandes douleurs au penil, & à l'orifice de la vessie, ne pouuant marcher que courbee, à cause de la douleur qu'elle sentoit ausdictes parties. Apres qu'elle eut vsé de beaucoup, & conuenables remedes methodiquement appliquez, tant interieurs qu'exterieurs, en son pays, ne sentant

point, ou à tout le moins bien peu d'allegeance de son mal, par l'aduis des Medecins qui la traitoient, se fit porter en lictiere à Pougues, sur la fin du moys d'Aoust, où s'estant faicte exactement purger & preparer, comme la maladie le requeroit, commença à boire de l'eau S. Marcel vne fois le iour au matin, quatre heures auant le disner, qu'elle continua vingt cinq iours, prenant la quantité qu'on auoit remarqué luy estre necessaire, de façon qu'elle rendoit l'vrine librement, sans aucune douleur, & presque en telle quantité, qu'estoit l'eau qu'elle auoit beue auparavant. Ce qui luy rapporta tel proffit, que s'estant retiree en sa maison, bien tost apres, fut entierement guerie de ses deux vlceres, & son corps remis en bonne disposition & habitude, comme plusieurs de ses voisins ont rapporté.

Tumeur & dureté de rate, en l'an 1592.

NOble homme messire Iean de Rupere, âgé de trente neuf ans ou enuiron, d'un temperament melancholique, estant de son ieune âge *splenodeis*, c'est à dire, suiet à vne tumeur de rate, avec dureté, le plus souuent accompagnée de douleur & difficulté de respirer, après auoir attenté, & vsé de beaucoup de remedes pour donner allegement a cette partie, par l'espace de neuf à dix ans, ne sentant que bien peu

d'allegence, s'achemina à Pougues l'an mil cinq cens quatrevingts & six, au mesme temps & saison d'Esté, que le Roy Henry troisieme vsoit desdites eaux sur ledict lieu. Apres qu'il en eut beu durant trente cinq iours, s'en retourna guary & n'a senti depuis douleur, ny grande tumeur en ladicte partie offencée, Si ce n'est que depuis vn an & demy en ça, preuoyant vne semblable disposition se preparer en ladicte rate, ledict sieur, reprint le chemin, pour recourir au premier remede, duquel il s'estoit bien trouué, & arriua à Pougues l'an 1592. au commencement du moys d'Aoust. Le iour apres qu'il fut préparé & purgé commença du matin sur les six heures à boire de l'eau de la fontaine S. Marcel iusques à quarante onces, & augmenta chascue matin d'un verre de huit onces, iusques à ce qu'il eut attainé la quantité de quatre vingts onces, laquelle continua l'espace de quinze iours les rendant bien dans cinq heures apres les auoir beues, & se sentant guery pour la seconde fois, s'en retourna chez luy avec grand contentement.

Fiebre quarte, & tumeur en la rate de l'an 1594.

VN religieux de la ville de Bourges, de l'ordre des Capucins, âgé de vingtsept ans d'un temperament melancolique, ayant esté malade de la fiebre quarte l'espace de six, moys,

avec vne tumeur à la rate, s'achemina en ceste ville, pour boire des eaux dudit Pougues. Durant les deux iours de l'intermission fut préparé par deux prinſes d'un benin & familier médicament propre à ſa nature, ſaiſon & maladie. Le iour après, qui eſtoit le temps du paroxyſme de la fiebure, voulut ſ'en aller à Pougues, auquel lieu, le lendemain matin, il beut de l'eau de la fontaine S. Marcel, à la façon, heure & ordre qu'on à accouſtumé, la quantité de ſoixante & dix onces : laquelle il continua durant tout le mois d'Aouſt, les rendant librement dans trois iours après, par les vrines, & quelque partie par les felles, luy rendant le ventre libre, de façon qu'il ſ'en retourna guery, tant de la fiebure quarte, que tumeur de la rate. Qui eſt contre l'opinion de pluſieurs, eſtimans ce remede ne pouuoir ſeruir à telle eſpece de maladie: Toutes-fois veu que ladiſte eau oſte les oppilations, & obſtructions des viſceres, corriger le ſang par trop bilieux & intemperé, paſſant par les veines Meſeraïques, & d'icelles au foye : Veu auſſi que l'oppilation de la rate, qui eſt le receptacle où ſe deſgorge l'humeur le plus melancholique, groſſier, & terreſtre, lequel lors qu'il ſe corrompt & putreſcie, eſt ſouuent matiere, & ſubieſt de ladiſte fiebure : On peut librement inferer l'vſage de ladiſte eau de Pougues eſtre propre pour cor-

riger la dycrasie, ou intemperie de ladicte fiebure
 Ce qui s'approche de l'opinion d'Amatus Lusitanus, centuria 2. parlant seulement de l'huile
 de vitriol, *Olei vitrioli, inquit, guttas tres infusus in
 aquam acetosa & borraginis haustus, per inferiora
 lumbricos eijcit, & putredini aduersatur. Hoc oleum
 membra roborat, ac vermes interficit, & calorem febri-
 lem infringit.* Si l'huile dudit vitriol artificiel a
 telle vertu, pourquoy l'eau minerale d'iceluy
 naturellement meslangée n'aura quelque ener-
 gie, voire plus gracieuse, & moins dangereuse
 que ladicte huile contre les susdites affections ?

Espece d'Epilepsie ou mal caduc de l'an 1594.

L'An mil cinq cens nonante quatre au moys
 d'Aoust, vn honneste homme âgé de trente
 cinq ans ou enuiron, d'un temperament melan-
 cholique, pour auoir vsé l'espace de quarante
 iours de l'eau de la fontaine S. Marcel, a esté
 guery d'une espece d'epilepsie, de laquelle il
 tomboit bien souuent comme en syncope, sans
 conuulsion, & sans extension des membres &
 nerfs, qui luy ouoit continué par l'espace de
 sept ans : qui semble estre l'espece de mal caduc,
 de laquelle Celse faict mention liure 3. chap. 24.
 Ce qui a esté veu aussi & remarqué par monsieur
 Vertunian sieur de la Vau, docteur en medecine
 de la ville de Poictiers, estans lors à Pougues.

Paralyse

*Paralysie guérie procedant d'une colique pierrense
en l'an 1594.*

VN honneste homme de la ville de Nyort en Poictou : âgé de quarante ans, d'un temperament bilieux, d'une habitude plethorique, ayant esté fort cruellement tourmenté d'une colique Nephritique, faisant par fois du sable, & grauiers en vrinant : tomba en une paralysie, où resolution de nerfs, des bras, mains & iambes : ayant toutesfois le sentiment entier : mais l'action & mouuement fort offensez, ne pouuant aucunement marcher ny hausser les bras, par remede aucun qu'il eust vsé : Ce que considerant il se proposa de se faire porter dans un brancart en ceste ville de Neuers, au moys de May : Où estant arriué, durant huit iours, on le fit preparer par des Apozemes, tant alteratifs que purgatifs, faicts de decoction de simples hepaticques & cephaliques, avec infusion de Rhubarbe & Agaric : & par autres remedes qu'on a remarquez estre propres selon les indications, qu'on a princes de sa maladie. Incontinent apres, on le porta au lieu de Pougues, pour boire de l'eau de la fontaine S. Marcel, obseruant exactement l'ordre, & methode accoustumés : Dans le neuuesme iour il resentit, non seulement ces grandes obstructions tant du foye que de la rate,

& reins se deboucher, & desopiler, mais aussi toutes les autres parties du corps debiles se fortifier, & la chaleur naturelle estre en plus grande force & vigueur. De faict les rayons des esprits animaux reprindrent leur force, pour penetrer & donner le mouuement & sentiment plus exquis à toutes lescdites parties. Car il commença de marcher sans beaucoup de peine, & mesme sans apuy alla aux fontaines, & au parauant falloit le leuer du liêt, & porter en lieu commode. De ma part ie puis seurement rapporter du dict malade, estant retourné à Neuers apres l'vsage de la dicte eau, l'auoir veu marcher, aller seul à l'Eglise, & auparauant qu'il vlast dudit remede (ayant esté appellé pour le visiter) non seulement n'eust peu se leuer seul, ny mesme changer de place, dans son liêt, sans ayde, ny sans douleur.

Par le mesme remede prins, les vns au mois de Iuin, d'autres au mois de Iuillet, & Aoust: sont esté gueris plusieurs depuis ledict temps dudit pays de Poictou & Lymoges, affligez de mesme maladie de Paralytie, procedant d'une mesme, cause, de colique bilieuse.

Au moys d'April dernier 1603. vn gentilhomme du pays de Berry âgé de vingtsept ans, affligé d'une semblable paralytie par ce seul remede à receu guerison.

Flux de sang par la verge, de l'an 1595.

VN honneste Gentil-homme nommé le Sieur de Mombalon, du pays de Bourgogne, âgé de cinquante deux ans, à esté fort vexé durant quatre ans, d'une douleur fixe au rein dextre, sans aucune apparence à l'exterieur: qui le poursuiuoit de telle sorte, qu'il ne pouuoit qu'à grand'peine aller à cheual, & quand il estoit descendu, rendoit quantité de sang en yrinant, sentant vne cuisson au bout de la verge, de sorte que plusieurs la iugoient procéder *ex attritione calculi* pour le violét exercice & traual qu'il prenoit à cheual: d'autres de la quantité, & qualité du sang, faisant rupture, ou erosion de quelque veine: les vns finablement disoient que la debilité des reins estoit si grande, qu'ils ne pouuoient retenir le sang qu'ils recepuoient. Soit que ledit sieur estant à cheual enduroit grande douleur en ladicte partie, sans auoir iamais difficulté d'vrine, sans faire sable ny granelle, sans estre suiet à colique, sentoit seulement vn grand degoustement, avec fiebre symptomatique, Voyant doncques ledit sieur que les remedes desquels il auoit vsé ne luy apportoint aucun allegement, il s'achemina en ceste ville de Neuers au commencement du moys d'Octobre, en deliberation de boire des eaux de Pougues: Ayant

esté purgé il beut l'espace de vingtcinq iours de l'eau de la fontaine S. Marcel seulement : la faisant apporter tous les matins à son logis, en cette ville de Neuers, puisce le mesme iour, en prenant chasque matin enuiron les neuf heures, la quantité de quatre vingts onces, & combien que la saison ne fust propre, ny l'heure conuenable pour les boire, & mesmes qu'elles fussent esté transportées desdictes fontaines en ladicte ville, il fut fort soulagé: Car s'estant allé promener à cheual portant la cuirasse par l'espace de cinq ou six iours, il rendit ses vrines sans aucune meslange de sang, sans cuisson ny douleur. Et receut plus de soulagement par lesdictes eaux en si peu de iours, & en si mauuaise saison, qu'il n'auoit faict en quatre ans, par tous les autres remedes, desquels il auoit vsé.

Maladie semblable à la precedente en l'an 1600.

VN Gentil-homme du pays du Dauphiné, d'un temperament melancholique, âgé de cinquante ans, depuis deux ans en çà estoit fort trauaillé, lors qu'il faisoit quelque exercice (fust il grand ou mediocre) d'une ardeur d'urine, & quant & quant rendoit avec l'urine quantité de sang. Apres auoir vsé par l'espace de vingt iours, au mois de Iuillet, audit an à Pougues, de l'eau de la fontaine Sainct Marcel, fust guarý desdits symptomes, & affection susdicte.

Maladie nommee des Grecs rous gynecceios, id est profluuium foeminarum, guerie l'an 1592.

VNe damoiselle demeurant en ceste ville de Neuers, âgée de trente deux ans ou enuiron, d'un temperament bilieux, fut par l'espace de deux ans suiuite à vn flux de sang fort excessif & desordonné. Car lors que le circuit & periode de telle euacuation s'approchoit, se rendoit si desreregler par l'espace de seize ou dixsept iours chascue mois, qu'elle estoit contraincte de garder le liect ordinairement pour la grande debilité, où l'abondance de tel flux la conduisoit, avec fiebre symptomatique: durant ledict temps de deux ans, ladicte damoiselle se fit secourir par tous les bons & cōuenables remedes à tels symptomes, & maladies propres, & bien à propos administrez, tant internes que externes, soit pour corriger la cacochymie, que pour euacuer la quantité excessiue des humeurs, sans en auoir resenty allegement, quoy considerant s'en alla à Pougues, où elle beut durant vingt iours de l'eau de la fontaine S. Marcel, vne fois le iour, au matin à ieun, la quantité de quatre vingts onces, & ce au mois de Iuin, obseruant exactement la façon & regime requis. Ladite damoiselle s'en reuin à Neuers guerie, & son sang remis à sa temperature. Depuis elle ma tesmoigné par plu-

sieurs foys, estre maintenant bien reglee ses moys ou purgations se representent, & cessant au temps & saison qu'il est requis & accoustumé, sans souffrir incommodité aucune à Dieu graces.

Et d'autant qu'ordinairement, ce qui aduient à plusieurs, donne plus d'assurance à la chose qu'on veult monstrier estre veritable, que lors qu'on ne l'a veue qu'en vn seul, ie puis aseurer auoir remarqué à Pougues, vne grande dame, & autres damoiselles malades de ce symptosme & mesme maladie que dessus, estans presque de mesme humeur, & complexion, auoir receu pareille guerison par l'usage de ladicte eau medecinale de la fontaine S. Marcel, & par ainsi m'a semblé n'estre necessaire, d'en faire plus ample mentiõ, veu que ce seroit repeter vne mesme chose, sans beaucoup de profit ny contentement.

Iaunisse, & moys de freiglez.

VNe damoiselle de Blois, âgée de trente deux ans, d'un temperament melancholique, estant icterique, c'est à dire, malade d'une iaunisse, accompagnée de mal d'estomach, difficulté de respirer, batement de cœur, avec des grandes lassitudes aux iambes, n'estant pas bien reglee en ses purgations naturelles, les ayant en bien petite quantité, & de mauuaise qualité, arriua à Pougues au commencement du moys

d'Octobre 1596. pour remedier à sa maladie, elle commença avec vn bon regime & methode, d'vser de la fontaine S. Marcel, sur le septiesme iour en beuuant luy suruindrent ses moys & ce nonobstant elle continua l'vsage de ladicte eau par l'espace de vingtfix iours, dont elle ressentit tel proffit, que ses purgations se rangerent en leurs cours & periode naturelle, se presenterent d'vne meilleure & plus louable qualité qu'elles n'auoient accoustumé, & resentoit allegement en tous les autres accidens & symptomes, desquels elle auoit esté par vn long temps affligée.

Affection de l'amarry ou matrice.

POur la consolation de plusieurs femmes que nous voyons souuent estre beaucoup affligées comme d'un tourment particulier à tel, sexe. On ne doibt (me semble) obmettre l'heureux succez qu'a iadis receu vne grand' Dame du pays de Normondie pour auoir vlé de l'eau, tant de la fontaine S. Marcel, que de S. Legier : laquelle estant veufue a esté cruellement tourmentée de grâds & diuers symptomes d'affectiō de matrice, comme foibleſſes ou lipotymie, palpitation du cœur, conuulsions, maintenant rits immoderez, tātost larmes & pleurs sans occasiō, puis parolles ridicules, grand bruit vagant par tout le ventre inferieur, par fois sembloit fre-

netique, luy suruenant par circuits. Ce qui a esté
remarqué par son medecin dudit pays, qui m'en
à fait le rapport ceste presente année 1603.
Dont elle est guerie.

Il y a enuiron dix ans qu'une damoiselle veufue
du pays de Poictou, estant furieusement molestee
d'une semblable maladie a receu guerison par
l'usage du mesme remede.

*Dysurie, ou difficulté avec douleur voulant
vriner, & gonorrhée gueries.*

VN Gentil-homme du pays de Normandie,
agé de trente ans ou environ, apres auoir
esté grandement affligé, & de long temps sujet
à une dysurie, ou difficulté d'vriner avec douleur
procedant d'une grande imbecillité de la faculté
expultrice, causee d'une resolution des reins, ne
pouans pas attirer la serosité du sang, qui est la
matiere de l'urine, & les nerfs des lombes, & de
l'os sacrum qui vont à la vessie, ensemble le mus-
cle sphincter estans debilités, & outre ledit sieur
estoit parfois sujet à une gonorrhée produite
d'une mesme cause, d'une resolution & imbecil-
lité des vaisseaux spermatiques : lesdicts symp-
tomes, & maladies luy auoient duré l'espace
d'unze ans, sans auoir sceu trouuer remede au-
cun : Et a fin que ceux qui seront atteints de
mesme maladies puissent recepuoir guerison à
son

son exemple : ou bien qu'on aye moyen d'vser
d'vne prophylactique pour s'en preseruer, pour
l'aduenir, m'a semblé estre bon de declarer la
cause, & occasion principale de tels symptomes.
Ceste maladie doncques & acciden ont pris leur
source procatarrique, ou externe d'vn trop grád,
& indiscret excez que ce gentil-homme fit estat
ieune, de l'age de dixsept ou dixhuict ans, s'estat
indiscretement efforce, en l'acte venerien, par
plusieurs foys dans vne heure, sans toutesfois
auoir esté apres atteint de bubon, & moins de
verolle, lequel effort luy causa dans deux heures
apres vne paralysie, & resolution des deux bras
& mains, ne les pouuant aucunement hausser ny
mouuoir : qui luy dura enuiron vn an & demy :
Mais avec les bons remedes dont il vsa, suiuant
vn bon & exacte regime de viure il s'en trouua
vn peu allegé, sentant neantmoins, lesdites par-
ties fort debiles. Toutesfois les susdicts symp-
tomes de dysurie, & gonorrhée luy ont continué
iusques à present. Et pour cet effect est venu
expres en ceste ville de Neuers, avec deliberatiō
d'vser des eaux medecinales de Pougues, cōme
d'vn remede souuerain pour sa maladie. S'estant
faict doncques au preallable deuement preparer,
selon que lesdits symptomes, temperamēt, age &
saison le requeroient, s'en alla audit Pougues au
cōmencemēt du mois de May, faisant loys bien a

propos vn temps chaud, sec, où il continua l'usage desdictes eaux vne fois le iour, le matin par l'espace de quarante deux iours en beuuât vnze verres chasque matin de la fontaine S. Marcel, le verre tenant onze onces, suiuant l'ordre & regime de viure qu'on luy auoit prescript, dans quatre heures apres auoir beu les rendoit, la plus grand part par les vrines, & ce qui pouuoit rester par les selles, luy faisant lascher le ventre, ayant vriné on voyoit ordinairement beaucoup de filaments, ou ratisseures blanches, & visqueuses que ladicte eau amenoit, & detergeoit passant par les vaisseaux & canal de l'vrine de si grands effects & energie a esté la vertu dudit remede, que ledit sieur s'en est retourné guery de toutes les maladies & symptomes, desquels il auoit esté vn si long espace de temps molesté, tant par les douleurs qu'il enduroit ou fascherie, & ennuy de la longueur: que pour les fraiz & despence qu'il auoit desia fait, & faisoit ordinairement pour y remedier.

Maladie semblable en l'annee 1601.

VN ieune homme de l'âge de trente ans ou enuirõ d'vn temperament melancholique, de la ville de Nantes en Bretagne: durant l'espace de deux ans, quelque remede qu'il eust vsé, ne peust, ny sceut guerir d'vne gonorrhée

venerienne. Considerant son mal inueteré, & opiniastre aux remedes, s'achemina à Pougues, au moys de May dernier, audict an. Où estât préparé, beut l'espace de seize iours seulement de l'eau S. Marcel chasque matin assez bonne quantité, suyuant l'ordre & methode qu'on a accoustumé d'observer : il n'aperceust aucunement sur le lieu la guerison de la maladie, mais s'estant retiré, quelque iours apres il guerit.

A son exemple vn autre honneste homme, du mesme pays, & ville, ayant esté certioré des effects dudit remede, par le rapport du susdit, me vint trouuer à Neuers pour ceste occasion, ayant esté grandement affligé d'une maladie semblable par l'espace de quatre ans, rendant par l'vrine quantité de pus, apres auoir vsé de ladicte fontaine S. Marcel, durant vingt cinq iours, s'en retourna en sa maison, avec vn grand contentement, & allegement de son mal, au moys d'Aoust, audict an.

Melancolique hypocondriaque. en l'an 1601.

Monsieur de Mirambeau de la maison de Pons, au pays de Saintonge, âgé de quarante cinq ans. d'un temperamēt bilieux, tendant sur le melancolique, ayant esté fort affligé d'un flux hemorrhoidal deregleré, & imoderé. Ce neantmoins luyect à vne melancolie hypocondri-

aque, depuis quatre ou cinq ans en ça, accompagnée de plusieurs, mauuais, & fascheux symptomes, comme grande debilité & foiblesse : avec vne couleur de visage, & mesme de tout le corps pale, approchant d'une iaunisse, ou passes couleurs, ne prenant plaisir en aucune compagnie, estant triste & craintif, sans suiet, s'entretenant de profondes & grandes pensées, & meditations, sans pouuoir prendre que bien peu de repos : & mesme iceluy inquiet, & turbulent, avec des songes espouuantables, abhorrent les viures, molesté des rots & vents, qui luy suruenoient par la bouche, avec vn bruit ou borborisme bruyat au costé de l'hypochondre gauche, signes euidens & pathognomoniques de la susdicte espeece de melancholie, lequel apres auoir vsé de beaucoup & diuers remedes, tât pour vne affection, que pour l'autre, ne receut iamais allegement tel, que par l'usage de leau qu'il a beuë à Pougues, durant vingt iours, au mois de Iuliet : ou peu à peu tous les accidens, & symptomes cy deuant descrits, furent mitigez, adoucis & la plus part gueris, les hemorrhoides remises en leur cours & periode naturelle, reprit son repos la nuict, & le dormir luy fut agreable, exempt de songes mauuais & fascheux, la couleur naturelle restituée. Ledit sieur beut le matin seulement vne fois le iour de l'eau S. Marcel,

obseruant le regime de viure, & les cautions necessaires. Il receut vn si grand profit dudit remede qu'il rendoit presque la quantite d'eau, qu'il auoit beue par les vrines. Ce neantmoins luy laschoient le ventre par quatre ou cinq fois, sans ressentir incommodite aucune, le tout auant que disner.

Ledict sieur pour confirmer le soulagement qu'il auoit apperceu, en si peu de temps s'est transporté pour la seconde fois à Pougues, ceste presente année 1601. au moys de Iuillet, où il a vsé de ladicte eau, par l'espace de vingt iours, ayant obserué les mesme cautions qu' auparauant, s'en est retourné avec contentement, louant & rendant, graces à Dieu, de leureux sucez, que de plus en plus il a apperceu, par l'usage de ladicte eau.

ADVERTISSEMENT.

LE Lecteur sera aduertty (s'il luy plaist) qu'il y a eu des malades entierement frustrez de leur intention ausquels est suruenu pour l'usage desdictes eaux, tout à l'opposite du succez qu'ils esperoient, tombans en vne entierere ruine de leur santé, & y auoir abregé le cours de leur vie & ce pour y estre venus trop tard, les viscères & partie nobles du corps estans desia vitiées & deprauee, ou bien leurs forces estant par trop debilitées, & aussi pour en auoir vsé sans estre inst-

ruicts, preparez & conduits par l'aduis de quel-
 que medecin, à qui l'intelligence en appartient,
 comme chose estant de son office, & debuoir :
 Et desire qu'on ne pense que cecy se die pour fai-
 re employer les medecins, qui dailleurs s'ot assez
 occupez. Mais seulement, par ce que iay remar-
 qué depuis seize ou dixhuict ans, en ça plusieurs
 mourir audict Pougues, ou par faute de s'estre
 cōduits par l'aduis d'iceux, ou bien pour les cau-
 ses cy deuant descrites, & principalement ceux
 qui s'ot esté attains d'hydropisie, plus que de tou-
 te autre espee de maladie. Et combien que les-
 dites eaux puissent seruir beaucoup, pour corro-
 borer les parties nobles debiles, & oster les ob-
 structions, en destoupant les premieres veines,
 que nous appellons Mesaraïques, & reigler l'ine-
 gale temperie, moyennant qu'on en vse en tēps
 & saison conuenable, ayant l'estomach suffisant,
 & capable pour recepuoir la quantité d'eau, qu'il
 est necessaire pour en s'etir quelque effect : Tou-
 tesfois me semble que les hommes bien seins &
 disposez, n'en doiuent point vsr, par ce que cou-
 stumierement le remede ne rencontrant point
 subiet pour agir, Il se ruë sur les parties nobles,
 & les peut offenser : Ainsi les eaux metalliques
 ou minerales de Pougues, à vn corps bien sain
 peuuent plustost nuire, que porter profit. Car
Qui integra sunt corporis valetudine, medicationes

agrè molestéque ferunt, Hipp. aph. 37. lib. 2. aph. Par quoy en l'vsage desdites eaux, pour paruenir à l'intention qu'on pretend, ie conseilleyrois volontiers à vn chacun, d'y proceder avec tel conseil, & raison qu'on peut apperceuoir y estre dauë & necessaire, apres auoir imploré l'aide de nostre souuerain Seigneur, qui donne la vertu aux eaux, & à toutes autres choses pour la commodité de l'homme.

Au reste ie supplie bien humblement le Lecteur, s'il cognoit ce traitté ne pouuoir donner contentement aux esprits dignes de voir matiere plus haute polie, & mieux elabouree de le prendre au moins, en bonne part, & croire s'il luy plaist, que ce n'a esté pour autre fin, ou intention, que pour le soulagement & profit particulier des pauvres malades, m'accommodant à eux : Ausquels ie supplie de tres bon cœur nostre createur restituer leur pristine santé, & par sa liberalité infinie leur distribuer sa sainte grace, qui est la vraye fontaine & source d'eau viue, & du salut eternel.

F I N.